


ANG MENSAHE

MAHITUNGOD SA GRASYA

 Salamat, Igsoong Neville. Panalanginan ka sa Ginoo. Maayong buntag, mga higala. Usa gayud ka pribilihiyo nga mahianhi na usab niining buntaga sa buluhaton sa Ginoo. Ug pasensya na kaayo nga wala kita'y igong espasyo para mapasigo ang mga tawo sa gamay'ng simbahan. Dili man gud kini makapasigo og ingon ka daghan. Apan malipayon gayud kami nga ania gihapon kamo ug andam nga mosakripisyo, og—og mapailubon nga naghulat kanamo. Ug buhaton namo ang labing maayo nga among mahimo para maipahayag kaninyo ang Pulong sa Ginoo sa labing maayo nga among nahibaloan kon unsaon sa pagpahayag Niini. Ug karon bag-ohay lang kong. . .

² Kining gamay'ng babaye nga bag-ohay lang misulod, ug aduna siya'y usa ka bata nga igadidikar karong buntaga, ug dayon nahunahuna man niya medyo ulahi na sila, ug ingon siya nga maghulat na lang kono siya. Wala ko pa nakita sukad-sukad ang maong babaye, apan nagaampo ako nga panalanginan siya sa Dios ug hatagan siya sa labing kadagaya nga mga panalagin Niya diha sa iyang kasingkasing, tungod kay mapailubon man siya nga maghulat.

³ Bueno, taliabot na ang panahon sa tuig sa diha nga magakabugnaw na ug dili na ingon ka init pag magkapunsisok kita sulod sa simbahan. Ug nagasalig kami nga ang Dios magapanalangin kaninyong tanan sa madagayaon gayud.

⁴ Karon buut kong isulti ang pipila ka butang dinhi sa dili pa ako mamulong. Naipahibalo ko na nga mamulong unta ako niining buntaga, kon gitugot pa sa Ginoo, mahitungod sa hilisgotanan nga *Ang Mga Hangin Diha Sa Alimpulos*. Apan bag-o ra Niya nga giusab kini para kanako. Wala ako kabalo kung unsay akong igasulti hangtud sa mga pipila ka minutos sa wala pa ko mianhi sa panagtigum. Ug akong gisulayan sa ikaduhang higayon karon ang mahitungod niana nga hilisgotanan, apan wala man ko nakadawat og tubag gikan sa Dios. Wala pud ko kabalo kon ngano. Basta pirmi kong ginatinguha nga maghulat sa gyud, nasayod man kamong tanan nga mga ministro nga ania dinhi, nga kinahanglan n'yo uná nga maghulat sa Ginoo kung unsa ma'y inyong igasulti.

⁵ Niadtong miaging gabii sa akong personal nga linya sa telepono, nakadawat ko og—og tawag nga gikan pa sa usa ka lugar sa Arkansas, bahin sa pipila ka tawo nga gustong mobalhin dinhi karong sunod nga semana, ang ingon nga

nakabalita kono sila nga magsugod na kita og usa ka panagtigum mahitungod sa *Ang Pito Ka Mga Selyo*. Ngani bag-ohay ra kong nahuman sa *Ang Pito Ka Mga Kapanahonan Sa Iglesia*, para sa mga bag-ohan nga ania. Ug ang iyang bana moanhi na kono inig ka Lunes para mangita og trabaho sa Louisville, aron makatrabaho na siya kono sa higayon nga moistar na sila nga duol-duol ra dinhi para makapatalinghug nianang *Pito Ka Mga Selyo*. Ingon ko, “Siguro magkinahanglan kana og mga tulo ka bulan, gining. Wala man gud kami’y igong lugar dinhi para ipahibalo ang maong panagtigum, ug uban pa, walay unsa man nga mapahilunaan niini dinhi sa lungsod, og walay igong mapalingkoran sa mga tawo.”

⁶ Mao nga gusto kong sa umaabot nga panahon, siguro, kung itugot sa Dios, nga ipapahigayon kana sa usa ka dakung buluhaton sa kon asa man, magpahigayon og panagtigum nga mga tulo-ka-bulan ug sugdan direktso ang mga selyo nga ingon niana, sa maong dakung buluhaton. Dayon mahimo ra nga magpabilin ang mga tawo hangtud nga mahuman kini.

⁷ Dinhi, maglangkob man gud kini gikan sa ika-6 nga kapitulo sa *Pinadayag*, hangtud sa ika-19. Busa mahisgotan ang pito ka mga selyo, ang pito ka mga hampak, ang tulo ka mga kagul-anan, ang babaye nga nagasakay sa mapula-og-kolor nga mapintas nga mananap, ug ang usa ka gatus kap-atan ug upat ka libo. Oh, daghan gayud ang pagahisgotan aron maitakdo kana tanan sa dili pa mahisgotan ang Ikapitong Selyo, ang pag-abot sa ikapitong hampak, ang pagtingog sa ikapitong trumpeta. Ug pagkadaghan sa mga butang nga magatakdo nianang tanan, ug ang kada usa niana usa ka pangtibuok-adlaw nga leksyon mismo.

⁸ Karon iduko nato ang atong mga ulo sa makadiyut alang sa pag-ampo. Sa dili pa kita mag-ampo, aduna ba’y pipila dinhi nga gustong mahinumduman sa niini nga pag-ampo, ug mahimo kining ipahibalo pinaagi sa pagpataas sa inyong mga kamot. Ug sa inyong kasingkasing, pamalandong mo sa Dios sa kung unsa ma’y inyong gikinahanglan karon. Ug magaampo ako nga igahatag Niya kana kaninyo.

⁹ Makagagahum-sa-tanan ug Maloloy-on nga Dios, Nga usa ka Dios nga nagatubag-og-pag-ampo, usa ka Amahan nga nasayod sa tanang gikinahanglan sa Iyang mga anak. Nakaila Ka na kanamo sa wala pa kami mahimugso, ug naihap Mo na ang among mga lakang, pati ang mga buhok sa among ulo, ug ang tanan namong mga pulong gitimbang na diha sa Imong timbangan. Busa, Ginoong Dios, tugoti kami niining buntaga nga magmabinantayon niining mga butanga, niining bililhon nga katungdanan nga aduna kami sa Imong atubangan.

¹⁰ Daghan sa naipataas nga mga kamot karong buntaga, dinhi niining gamay’ng panagtigum, tingali’g alang sa pag-ampo

para sa ilang mga masakitong lawas, o kaha para sa usa ka nahilasaag nga minahal sa kinabuhi. Nasayod Ka sa ilang mga mga kasingkasing ug sa tanan-tanan nga anaa kanila. Kay, kaniadtong ania Ka pa sa ibabaw sa yuta, diha sa porma sa usa ka tawo nga ginganlan og Jesus, nga among Ginoo, nasayran Mo man ang pinaka-tinago sa kasingkasing. Ang tanang butang nga mahimong hunahunaon sa mga tawo diha sa ilang mga hunahuna, mahimo Mong sultihan sila sa gilayon kung unsay ilang ginahunahuna, “Nganong nangutana man kamo bahin niining mga butanga sulod sa inyong kasingkasing?” Nasayran ni Jesus ang ilang mga panghunahuna. Ug among mabasa sa Kasulatan nga Ikaw mao sa gihapon kagahapon, karon, ug hangtud sa kahangturan. Ug nahisulat usab kini nga, “Diin gani ang duha o tulo nga magakatigum, anaa Ikaw sa ilang taliwala.” Busa ania gyud Ikaw niining buntaga, diha sa porma nga Balaang Espiritu, ug nasayod sa matag tinguha nga anaa sa kasingkasing sa mga tawo.

¹¹ Nagaaampo ako Kanimo, Amahang Dios, nga tubagon Mo sila ug moingon, “Tapos na kini. Natubag na ang inyong hangyo, ug Ako—ginapadala Ko kaninyo ang kasiguradohan niining adlaw nga ang tanan n’yong gipangamuyo gikahatag na.”

¹² Dios, ginahinumduman pud namo ilabina kadtong mga dili-luwas, nga nagpataas sa ilang kamot. Hinaut nga mao na kini ang takna nga dawaton nila si Cristo ingon nga ilang Manluluwas.

¹³ Sa dili pa matapos kining panagtigum karong adlaw, hinaut nga aduna gayu’y mahitabo, Ginoo, nga magadala sa Imong Presensiya nganha sa mga tawo sa ingon ka haduol aron masayran nila nga kadtong mao ra nga Jesus nga naglakaw sa Galilea kaniadto ania usab sa taliwala sa Iyang mga tawo, aron nga mangbiya sila gikan dinhi niining adlaw nga aduna og mao rang kasiguradohan sama niadtong mga naggikan sa Emmaus niadtong panahona. Nga sa dihang atua sila sa dalan sa ilang pagpamauli, human nga nakiglakaw sila uban Kaniya sa tibuk adlaw, nakapakig-istorya Kaniya, ug Siya usab nakig-istorya kanila, ug sa gihapon wala gyud sila mahibalo nga Siya na diay kadto.

¹⁴ Oh Dios, daghan kaayong mga higayon nga kami’y ingon niana usab. Ngani nagapakigsulti Ka kanamo diha sa pagsalop sa adlaw, diha sa panag-awit sa mga langgam, diha sa pagkagaskas sa mga dahon, diha sa paglimbukad sa mga bulak, diha sa mga alawiton sa iglesia, ug wala gayud namo maila nga Ikaw kana. Sulod sa mga lawak nga may nagmasakiton diha sa ospital, og daghan pang ubang mga dapit, nagapakigsulti Ka kanamo ug wala gayud namo naamgo nga Ikaw kana.

¹⁵ Karon, Ginoo, sa diha nga manguli kami unya sa among mga panimalay karong buntaga, hinaut nga kami, makaila usab, sama kanila kaniadto, hinaut nga aduna Ka og pagabuhaton

sa among taliwala karon sama sa Imong gibuhat kaniadto. Hingsayran nila ang maong butang nga Imong gibuhat sa ilang atubangan kaniadto. Gibuhat Mo kadto sa wala pa ang Imong pagkalansang, ug naila nila nga kadto mao ang nabanhaw nga Ginoo. Namalik sila sa ilang mga pundok, nga nanagkalipay ug nanagdayeg sa Dios, tungod hingsayran man nila nga Siya buhi diay. Ug miingon sila, “Dili ba ang atong mga kasingkasing nagadilaab man sa sulod nato samtang nakig-istorya Siya kanato diha sa dalan?” Ginoo, ang Imong pagpakita didto ug pagbuhat og usa ka butang nga sama sa Imong gibuhat sa wala pa ang Imong pagkalansang, mao ang nagpamatuod sa Imong pagkabanhaw, nga Ikaw ang mao sa gihapon nga Jesus, nga nagpahinumdom kanila sa ilang kinatibuk-ang pagpakig-istorya uban Kanim. Nakigsulti man usab Ka kanamo sa tibuok semana, Ginoo. Karon magpakita Ka sa among taliwala ug ipadayag ang Imong Kaugalingon nganha sa matag nanginahanglan nga kasingkasing. Kay amo kining ginapangamuyo sa Ngalan ni Jesus, ug alang Kaniya. Amen.

¹⁶ [Usa ka igsoong babaye ang nagasugod sa pagsulti og laing mga dila. Blangko nga bahin sa teyp. Usa ka igsoong lalaki ang nagahatag og paghubad—Ed.]

¹⁷ Karon mag-ampo ang kongregasyon:

Amahan namo Nga anaa sa Langit,
Pagabalaanon ang Imong Ngalan.

Umanhi ang Imong Ginghamian. Pagabuhaton
ang Imong kabubut-on dinhi sa yuta,
maingon sa Langit.

Hatagi kami karon sa pagkaon namo sa matag
adlaw.

Ug pasayloa kami sa among mga sala, maingon
nga nagapasaylo kami sa mga nakasala
kanamo.

Ug ayaw kami itugyan sa mga panulay, kondili
luwasa kami sa kadautan; kay Imo ang
Ginghamian, ug ang gahum, ug ang himaya,
hangtud sa kahangturan. Amen.

¹⁸ Kung ang akong pangsulat mamahimo lang unta og usa ka tigib sa magkukulit ug ang akong papel mamahimong bato, ug kining mga Pulong nga akong ginasulti karon, maikulit lang unta diha niini aron nga mapakaylap Kini sa tanang mga katawohan.

¹⁹ Ang Balaang Espiritu sa Dios aduna ma'y talagsaong mga pamaagi sa pagpakighilambigit sa Iyang katawohan. Sa makadaghan nang higayon pinaagi sa mga katingalahan ug pinaagi pud sa mga gasa ug mga pagtawag, nga walay pagkabakwi, nga ginahatag kini sa Dios sa Iyang mga tawo pinaagi sa Iyang grasya.

²⁰ Nakauli ako karon, para sa mora'g hamubo nga bakasyon. Kasagaran ginagahin ko kini nga higayon para makauli, sa niini nga panahon sa tuig, tungod gusto ko man nga makapag-relaks pag nagapangayam ako og squirrel. Ug didto ako sa Kentucky niini nga semana kauban ang akong mga higala, nga nangayam og squirrel, sa akong paborito nga lugar. Sa unsa mang paagi nadiskurahi ko, dili tungod kay wala ako'y nakaplagan nga mga squirrel, kondili mibati lang gyud ko og pagkadiskurahi. May sa kung unsang butang nga nagaingon kanako nga kinahanglan ko nang mouli. Ug sa pagpauli na natulog ra ko sa sakyanan.

²¹ Niadtong miaging tuig, kabalo na man mong tanan, pinaagi sa na-imprinta na nga libro ug usab sa testimonyo ug sa mga teyp. Nagalingkod ako sa usa ka dapit dinhi sa Indiana kon diin minaug ang Ginoong Dios ug nakigsulti kanako, nga, ang akong ikaduhang ministerio, andam nang mahitabo sa dili madugay. Ug dihay gilitok nga tulo ka squirrel aron motungha. Kabalo na man mong tanan sa maong estorya, sigurado ko. Sa unsa mang paagi, sa nagalakaw ko didto sa dalan akong . . . samtang gipasagdan ko ra nga nangadto sa halayo ang mga kauban kong lalaki, nga nagapangayam pud, ako—aduna ko'y talagsaon nga pagbati nga gusto kong moadto sa niini nga dapit pag-usab. Wala pa nagbanagbanag kaniadto, nagaulan pa gyud, ug wala gani ko kabalo kon makapangayam ba sila o dili, apan basta moadto gyud ko sa may umahan didto. Ang *pagpangayam* nagakahulogan og “para makapag-inusara mismo, aron sa pag-ampo.” Ug akong gihunong ang sakyanan ug minaug ko ug naglakaw na sa dalan ug mipaingon sa kasagbotan, ug wala pa nagbanagbanag kaniadto, medyo ngitngit pa, sa kadlawon.

²² Mihunong ako ug naghalad og hamubo nga pag-ampo, sama sa naandan na, ug nagasulti sa Amahan, nga, “Kung unsa lang ang akong gikinahanglan, mao lang ang ihatag.” Wala ko nagatoo sa pag-usik-usik og bisan unsa man, o basta-basta lang nga mamusil; wala gyud ko sukad-sukad namusil og langgam sa tibuk kong kinabuhi para lang sa pagpraktis-praktis og pagpamusil, o unsa man. Kung unsa ma'y akong mapangayam, ginakaon ko, o kaha ihatag sa kang kinsa man nga mokaon niana. Wala ko nagatoo sa pag-usik-usik og bisan unsang butang. Wala ko nagatoo sa pagbuhat og mga ingon anang butang, tungod kay dili man kana husto.

²³ Dayon sa akong pagliko ug hinay-hinay kong naglakaw sa usa ka pamilyar nga gamay'ng agianan sa may kilid sa sibsibanan nga nagporma'g-L didto sa kakahoyan, ug dunay talagsaong butang ang nahitabo. Sa tanan-tanan kong mga kasinatian, wala ko nakasinati og unsa man nga sama niadto. Mihangad ako sa ibabaw sa bungtod sa akong wala kon diin ako nagatindog, ug didto, gikan sa may ibabaw sa bungtod, mitungha ang tulo ka balangaw. Ug ang maong mga balangaw dunay mga traynta-ka-piye ang kahabogon. Una, mitan-aw

ako ug nakita ang Kahayag ug milingi ako, tungod abi ko man gud nga tungod ra kadto nga pasubang na ang adlaw. Pero nahunahunaon ko pag-usab, dili man kadto paingon sa direksyon sa adlaw, sa direksyon man kadto pahabagatan. Ug usa pa ka butang, gabonon, dag-umon, ulan-ulan, og nagaulan man sa tibuok lugar didto. Ikabaynte-singko kadto sa Agosto, niadtong miaging Biyernes sa buntag, ug kabalo man mo nga naga-ulan-ulan niadto. Ug may mga dag-um bisan asa.

²⁴ Ug mitan-aw ako pag-usab. Ug atua kadto, nga nagakahabog ug nagakahabog pa, ang tulo ka balangaw. Gihubo ko ang akong kalo. Gibutang ko ang akong riple. Hinay-hinay ko nga naglakaw paingon niadto nga nakataas ang akong mga kamot. Ug daw sa may kung unsang butang nga misulti kanako, “Igo na imong kahaduol.” Molvingkod na unta ko ug huboon ang botas nga akong gisul-ob, aron hibaloon kung mahimo ko ba nga magpaduol pa. Apan sa pagduol ko pipila ka yarda ang gilay-on gikan niadto ug akong nakita ang kolor niadto, samtang ang gabon naga-alisngaw sa palibot. Nagpabilin ra ko sulod sa pipila ka gutlo. Nagagikan kadto mismo ibabaw sa bukid. Ug nagtan-aw ra ko, samtang ang tulo ka balangaw (ang usa nga anaa sa tuo, ang usa nga anaa sa wala, ug ang usa pa nga anaa sa tunga) nagapaubos paingon ngadto sa mora’g usa ka dolang. Kung unsa man kadto, buhi gyud, nga nagapaubos Kadto ug nagalihok Kadto. Ug nagpabilin ra kong nagatindog didto samtang medyo mangitngit pa, sa kadlawon.

²⁵ Milingi ako ug mitan-aw pag-usab, ug misinggit ko, “Oh Dios, unsa ma’y buut Mong ipahibalo sa Imong alagad?”

²⁶ Niadtong tungora mismo mikunsad ang Espiritu sa Ginoo ug miingon, “Si Jesus sa Bag-ong Tugon mao si Jehovah sa Daan, nag-ilis lang Siya sa Iyang maskara gikan sa pagka-Espiritu ngadto sa pagkahimong-Tawo.” Pagpanghimatuod kadto, siyempre, sa akong Mensahe mahitungod Kaniya. Sa pagpahibalo kanako, paghatag og kasiguradohan nga kining traynta’y-uno ka tuig nga milabay wala napaingon sa walay kapuslanan.

²⁷ Sa dihang hinay-hinay na akong miduol, hinay-hinay pud Kadto nga nagakahalayo, ug mipaingon na sa niining mora’g dolang nga butang, ug nawala ra dayon. Moduol unta ako. Pero nahadlok na ko nga magpahiduol pa, tungod kay Iya na man kong gipugngan sa wala pa ako nakadangat didto.

²⁸ Milingi ako ug namatikdan ko nga kadtong Kahayag, kung unsa ang pagdan-ag Niini kanako, milinya gayud sa may kahoy nga akong gilingkoran niadtong miaging tuig, kon diin mitungha ang mga squirrel. Mga traynta’y-singko o kuwarenta ka minutos human niadto, miadto ako sa kakahoyan ug didto sa kasapaan ug uban pa, hangtud nga nakadangat ko sa niining kahoy nga nagakabahin-bahin sa upat ka direksyon (sidlakan, amihanang,

kasadpan, ug habagatan), nga ang upat ka sanga sa maong kahoy, nagakahimo nang tuud. Ug mikatkat ko sa niining sanga, ug napamalandongan ko kaniadtong gisultihan Niya ako niini nga Kasulatan, “Kung magaingon ka niining bukid, ‘Bumalhin ka.’” Ug nagpabilin ko didto sa makadiyut, nga wala na naghuhuna mahitungod sa balangaw, nawala na kadto sa akong hunahuna. Nagpabilin sa ko didto. Ug usa gayud kini ka dili maayo nga tuig para sa pagpangayam og squirrel, may sa kung unsang butang nga wala na sa panahon, tungod wala ma’y mga squirrel.

²⁹ Sa hunahuna ko, “Dinhi kadto mismo kon diin gihatagan ko sa Dios og mga squirrel niadtong miaging tuig, nga gilitok ra aron motungha.” Gihubo ko na usab ang akong kalo, ug ingon ko, “Ginoong Dios, Ikaw ang mao sa gihapon nga Jesus. Ikaw maoy Dios sa gihapon.”

³⁰ Ug may Sa Kung Unsa nga misulti kanako, “Pila ba ang imong gikinahanglan niining higayona?”

³¹ Ingon ko, “Sama ra sa akong gikinahanglan niadtong miaging higayon, hangtud ra sa pueheng pangayamon.” Ug dayon miingon ko, “Makapangayam na ko niining ginalimita nga kadaghanon sa dili pa mag-alas diyes karong buntaga.” Ug daw sa pagkatalagsaon, nga niadtong tungora mismo atua man gud ko sa lugar nga daghan kaayo’g lamok, sa gipuy-an mismo sa mga lamok, ug medyo lapokon pud ang yuta, ug dunay milupad nga usa ka dakung lamok nga mopaak na unta kanako sa may mata mismo, ug ingon ko, “Wala gyud ni usa niini ang makababag kanako niining adlaw,” bisan wala ko’y pang-abog sa mga insekto o unsa man nga dala-dala nako. Ug, sa kalit lang, miingon ko, “Modan-ag na ang adlaw sulod sa traynta minutos.”

³² Ug pagkasulti ko niadto, sa akong luyo mismo, dihay usa ka squirrel nga eksaktong sama gayud niadtong sa miaging tuig, bata pa, og pulahon, ang milukso gikan sa sanga nga mga setenta ka yarda ang gilay-on ug misugod sa pag-igiik. Mitalikod ako. Tungod sa kalayo sa distansya, dili na nako halos, makita ang mata niini, pinaagi sa teleskopyo. Gipusil lang nako dayon, mao lang kadto, basta wala gyud nako gipuntirya, nga medyo ibabaw ra sa maong squirrel. Ug ang bala eksaktong miigo mismo sa mata niini kon diin pud kini naigo sa miaging higayon.

³³ Nagpadayon na ko sa paglakaw didto sa kakahoyan. Ug eksaktong tres minutos adisir nag-alas diyes, napusil ko na ang akong ikatulong squirrel, sama ra niadtong miaging tuig, eksaktong pareho gayud. Nga tres minutos adisir nag-alas diyes. Ang Dios, nga mao’y akong matinud-anong Maghuhukom, wala gyu’y bisan usa ka lamok nga mihagong kanako sa tibuok adlaw, nga ako atua mismo kon diin dunay mga tonelada sa mga lamok, sa hunahuna ko, kung timbangon man sila. Ug gyud ko’y nakita o nakadungog man ni usa ka lamok. Naminaw ko, aron hibaloon

kung duna ba ko'y madungog bisan usa kanila. Ug duna ko'y nadungog nga paghagong, sa hunahuna ko, "Aduna gyu'y usa sa kon asa man," ug akong gipaminaw ug usa man diay kadto ka truck, didto dapit sa may highway. Ug eksaktong traynta minutos gikan niadtong orasa, midan-ag na ang adlaw nga ingon ka maanindot ug mahayag.

³⁴ Dayon mibalik ako sa maong lugar. Ug nakahunahuna man gud ko, sa dihang miingon ko og "basi sa ginalimita," nagapasabot man kana og *lima ka squirrel*, nga mao'y ginalimita nga puedeng pangayamon dinhi sa Indiana. Apan akong nahinumduman niadtong miaging tuig, sa dihang gipangutana ko Niya kung pila ba ang akong gikinahanglan para kaonon, miingon man ko nga, "tulo," ug mao nga nakapangayam lang pud ko og tulo. Busa kagahapon mibalik ako, miadto ko sa mao gihapong lugar, ug Adunay miingon, "Ayaw paglahos. Tabok sa kalsada."

³⁵ Ug eksaktong pagka-alas diyas, impunto, alas diyas sa akong relo, akong napusil ang basi sa ginalimita sa Indiana nga kadaghanon, ang ikalimang squirrel. Gusto kong matikdan ninyo nga adunay tulo ka balangaw, ug dunay tulo usab ka butang nga gikasulti, tulo ka squirrel nga napusil. Adunay tulo ka butang: may tulo ka squirrel adisir nag-alas diyas, nga walay mga lamok man lang, og midan-ag ang adlaw pagkahuman sa traynta minutos. Ug adunay tulo usab nga magpamatuod bahin niana: si Igsoong Banks Wood, ang iyang anak nga si David, ug ang akong anak nga si Billy Paul, ang magpamatuod niana.

³⁶ Sa pagkakita ko niadtong mga balangaw, nga mga ingon ka halapad sama nianang lingin nga kahayag, kanang Manulonda sa Ginoo, apan ang maong tulo ka balangaw naglangkob nga Usa ra. Oh, daw sa unsa nga nakatabang gyud kana sa akong kasingkasing, nga masayran nga ang Dios, si Jesus dili ingon nga yanong tawo lamang maingon sa ginahunahuna sa mga tawo nga Siya'y, usa lang kono ka propeta, sama sab sa niining modernong ideya nga nagahunahuna nga si Jesus kono usa lang ka propeta, Siya mao mismo si Jehovah sa Daang Tugon nga nahimong unod ug nagpuyo ipon kanato. Ug, mao nga, nakapadasig gayud kana kanako. Dayon, mahunahuna ko ang bahin nianang hilisgotanan, nga ang Dios gipangita ang ingon ka daghang mga tawo.

³⁷ Karon, adunay usa ka pundok sa mga tawo, nga nagatawag sa ilang mga kaugalingon nga "Oneness" o kaha "Jesus Only." Dili gyud ako uyon kanila mahitungod sa ilang teorya. Dili usab ako uyon—uyon nianang pundok nga trinitarian nga nagaingon nga aduna kono og tulo ka managlahi nga Dios, ang mga pinaka-trinitarian. Apan nagatoo ako nga ang maong tulo, Amahan, Anak, ug Espiritu Santo, Usa ra, kana sila mao ang tulo ka opisina sa usa ra ka Dios. Ngani nagpuyo man Siya kaniadto diha sa pagka-Amahan, diha sa Haligi nga Kalayo; nagpuyo pud

Siya diha sa pagka-Anak, diha kang Jesus Cristo; ug nagapuyo Siya karon diha sa Espiritu Santo, diha sa Iyang Iglesia. Ang mao sa gihapong Jesus nga nahimong unod ug nagpuyo ipon kanato, ania man uban kanato niining adlaw, sa atong taliwala, diha sa porma nga Balaang Espiritu.

³⁸ Sa tanan-tanan kong mga kasinatian! Sa akong unang paglingi ug nakita Kini, una naghunahuna ko nga basin ang adlaw ra Kadto nga milusot sa—sa panganod sa kon asa man, apan wala pa man misubang ang adlaw niadtong tungura. Dayon sa dihang milingi ko pag-usab, ug akong nakita nga dili man kadto usa ka kahayag, kadto’y mga balangaw diay. Ug dayon sa akong pagtan-aw ug pagkakita ko niadto, nanggahi gud ang tibuok kong lawas.

³⁹ Dunay miingon kanako bag-ohay pa lang, “Wala ka ba mibati nga daw sa gusto mong mosinggit?” Wala, wala ko mibati nga mora’g gusto kong mosinggit. Ang ingon nianang mga kasinatian dili man nagapabati kanimo nga mora og gusto mong mosinggit, ang mga ingon-ana nagapabati hinoon kanimo nga nakaangkla ka gayud, pagnasayran mo mismo nga may sa kung unsang butang nga nagasulti kanimo, usa gayud ka kalipay nga pagbati.

⁴⁰ Bueno, tinuod kanang mga butanga. Kabalo ko nga dunay mga butang nga ginasulti nato, nga sa makadaghang higayon ang ubang mga tawo moingon ra og, “Oh, wala ko nagatoo sa ingon nianang mga butang.” Dili ako makagarantiya nianang, wala nako masayri. Makagarantiya lang ko sa kung unsay nahibaloan ko nga kamatuoran. Ug ang Dios nga Makagagahum-sa-tanan, Nga nagsulat niining Biblia, ug ako nga Iyang alagad, nasayod Siya nga tinuod kana.

⁴¹ Palandunga n’yo kini, nga sa panahon nga atong ginapuy-an, sa dili pa ang pag-abot sa Ginoo, miingon si Jesus, “Magkaaduna og mga ilhanan diha sa kawanangan ug sa yuta, may dagkung mga talan-awon, mga flying saucer, mga missile, panagkalibog sa panahon, kagul-anan sa kanasuran, ug makahahadlok nga mga talan-awon sa ibabaw sa yuta.” Ug nagapuyo na kita niana nga panahon, aron makita kanang mga butanga.

⁴² Karon, para sa Mensahe nga akong napili niining buntaga, gusto kong mopakli kamo uban kanako sa mga Kasulatan, dinha sa Zacarias. Mao kana ang akong. . . Zacarias, sa—sa ika-4 nga kapitulo.

⁴³ Tinguha ko kini nga sultihan kamo niining mga butanga. Sa makadaghan nang higayon dunay mga butang nga nagakahitabo nga dili—dili ko na ginahisgotan, og dili ko na ginasulti. Apan kini’y ingon ka mahinungdanon gayud para ililong kini sa iglesia. Kinahanglan gyud kining isulti! Ug, sa atubangan sa Dios kang Kinsa ako nagabarug, mao gyud kini ang kamatuoran. Nasayod ko nga adunay usa ka Dios, ug nasayod sab ko nga si

Jesus Cristo mao ang Anak sa Dios, si Emmanuel, nga nagapuyo sa taliwala sa Iyang mga katawohan sa karong panahon diha sa porma nga Balaang Espiritu. Ug nasayod gyud ako nga ang Pag-abot sa Ginoo nagakahiduol na, sa diha nga nanangpanungha na ang mga ilhanan ug mga katingalahan.

⁴⁴ Bag-o ra kitang nahuman sa Pito ka mga Kapanahonan sa Iglesia, ug masayran nato nga kita'y anaa na sa katapusan ug sa Kapanahonan sa Iglesiang Laodicea, sa diha nga ang iglesia mamahimo nang walay-pagtagad, mabugnaw na, nanaghimo na og denominasyon, ug nanag-organisa na; ang mga organisasyon na ang mokontrolar niini, og magaut-ot niini. Apan aduna ma'y usa ka saad nga adunay diyutay'ng mga mahibilin. Adunay usa ka Iglesia nga mangapatlaag sa bisan asa nga dapit, apan pagatigumon ra Kini sa Dios ug pagasakgawon Kini paingon sa Himaya; usa ka diyutay'ng gibalaan nga pundok sa kon asa man, nga nanaghulat sa Ginoo.

⁴⁵ Bueno niadtong miaging adlaw sa paghisgot ko mahitungod sa *Setenta Ka Semana Ni Daniel*, samtang nagatindog ko dinhi mismo sa pulpito, may Butang nga misantop kanako, dili ko gayud mahimo nga mahikalimtan kadto. Ang makita ang panahon nga atong gikinabuhian! Gusto kong moadto sa kon asa man ug magbuhat og usa pa ka butang, aron dili sa ko makahunahuna niadto. Aduna ko'y daghan pa kaayong mga minahal sa kinabuhi nga dili-luwas. Ingon nga nasayod na ako, unsa ma'y akong buhaton aron mamaluwas sila? Unsa ma'y akong mahimo? Naiwali ko na ang Maayong Balita. Nakapamuhat na ang Dios og dagkung mga ilhanan ug mga katingalahan nga wala pa Niya nabuhat sukad-sukad sa pagsugod sa kalibutan, sukad pa sa mga adlaw ni Ginoong Jesus, wala pa Niya kana gibuhat sa tibuok kasaysayan sa panahon. Ug mikaylap kini sa tibuok kalibutan. Ug sa gihapon padayon man hinoon nga nagakagrabe ang kalibutan. Apan kinahanglan kong timan-an nga nagakinabuhi na kita sa Kapanahonan sa Iglesiang Laodicea, kon diin ang mga tawo mas magkagrabe pa gyud, ug gikaingon na man Niini nga sila'y mamaingon-niana gayud.

⁴⁶ Busa ang akong gipili niining buntaga, ingon nga gibatikos og ayo ang Mensahe, ang usa pa ka butang usab nga akong gipaningkamotan gayud, mao ang, magwali mahitungod sa grasya. Gusto kong mamulong bahin niana karong buntaga samtang magabasa ako sa ika-4 nga kapitulo sa Zacarias, sa usa ka bahin niana.

Ug ang manulonda nga nakigsulti kanako mianhi pag-usab, ug nagpukaw kanako, ingon sa usa ka tawo nga gipukaw gikan sa . . . pagkatulog,

*Ug siya miingon kanako, Unsa ba'y imong nakita?
Ug ako miingon, nakita ko, ug ania karon ang usa*

ka tangkawan nga lunsay bulawan, uban ang iyang panaksan sa ibabaw niini, ug ang iyang pito ka mga lamparahan ibabaw niini, ug adunay pito ka tubo sa tagsatagsa sa mga lamparahan, nga diha sa tumoy niini:

Ug duruha ka mga kahoy-nga-olivo haduol niini, ang usa diha sa too nga panaksan, ug ang usa diha sa wala nga kiliran niini.

Busa ako mitubag ug misulti sa manulonda nga nakigsulti kanako, sa pag-ingon, Unsa ba kini, ginoo ko?

Ug ang manulonda nga nakigsulti kanako mitubag ug miingon kanako, Wala ba ikaw mahibalo kung unsa kini? Ug ako miingon, Wala, ginoo ko.

Unya siya mitubag ug misulti kanako, nga nagaingon, Kini mao ang pulong sa GINOO kang Zorobabel, nga nagaingon, Dili pinaagi sa kusog, ni pinaagi sa gahum, kondili pinaagi sa akong espiritu, miingon ang GINOO sa mga panon.

47 Nakita n'yo na? Ang Mensahe dili moabot pinaagi sa kung unsa man nga mga kusog o mga gahum, kondili pinaagi sa Espiritu sa Dios! Ulahing bersekulo, ika-7 nga bersekulo.

Kinsa ba ikaw, Oh daku nga bukid? sa atubangan ni Zorobabel ikaw mahimong patag: ug iyang pagulaon ang pangulong bato uban ang pagsinggit, pagtuaw, Grasya, grasya ngadto kaniya. Grasya, grasya ngadto kaniya.

48 Nasayod na kitang tanan niini nga Kasulatan, kadtong mga nagabasa sa Biblia. Nasayod kita nga panahon kini kaniadto sa pagpangandam sa pagtukod pag-usab sa templo. Ug si Zorobabel usa ka halangdon nga principe sa taliwala sa mga tawo, kinsa mao'y nagtukod sa maong bilding. Karon, kamo, gusto kong isul-ob ninyo ang inyong espirituhanong panghunahuna, dinihogan nga hinagiban, niining buntaga, samtang magahanduraw kita. Ug desidido gayud kining halangdon nga principe nga tukoron pag-usab ang balay sa Ginoo. Ug dayon, sa dihang nagdesisyon siya, iya nang gipahimutang ang batong pundasyon.

49 Ug kon padayonon nato sa pagbasa, atong masayran nga miingon ang Dios, "Gipahimutang ni Zorobabel ang patukoranan pinaagi sa iyang mga kamot, iya usab pagulaon ang pangulong-bato." Gusto kong inyong himatikdan, nga wala gayud miingon Siya nga pagulaon sa maong principe ang "Batong-pamag-ang." Kondili pagulaon niya ang "pangulong-bato."

50 Ug nasayod man kita nga nagaingon ang Kasulatan nga si Jesus mao ang Ulohang Bato-sa-pamag-ang, ug Siya usab ang Pangulong-bato. Karon kung atong hunahunaon sa pipila

ka gutlo, ingon nga, ang ikapitong mensahero sa iglesia mao ang “mopasig-uli sa Pagtoo sa mga anak balik ngadto sa mga amahan.” Sa laing pagkasulti, ang magatukod sa Iglesia pag-usab ilalum sa Gahum sa Espiritu. “Dili pinaagi sa gahum, dili pinaagi sa kusog, kondili pinaagi sa Akong Espiritu,” ang ingon sa Ginoo. Dili pinaagi’g organisasyon, dili pinaagi’g denominasyon, kondili pinaagi sa Balaang Espiritu, nga ipatungha sa Dios ang Iglesia sa kaulahiang adlaw.

⁵¹ Si Zorobabel, ang principe nga kauban ni Josue, mao ang magpagula niining pangulong-bato. Gipahimutang niya kaniadto ang patukoranan, gipabalik niya ang mga tawo ngadto sa patukoranan, ingon nga tipo.

⁵² Diin, nasayod kitang tanan nga kining mga tangkawan ug uban pa parehong nagrepresentar sa mga Judio ug iglesia. Sila mao ang “mga sanga sa olivo,” ang ingon dinhi sa Biblia. Ug ingon nga sanga sa olivo, kita mao ang ihalas nga sanga nga gisumbak ngadto sa gamut sa maaghop nga kahoy’ng olivo; ang mga Gentil! Ug sa niining duha ka sanga nagagikan ang mga tubo sa incienso, paingon sa pito ka tangkawan nga bulawan, aron maghatag og Kahayag sa Pito ka Kapanahonan sa Iglesia.

⁵³ Karon hinumdumi n’yo, nga sa atong pagtudlo bahin sa mga leksyon nga bag-o ra natong nahuman, gihisgotan nato ang piramide nga gitukod ni Enoch, ug gitun-an kana sa makadiyut. Pero wala pa napahimutang ang pangulong-bato diha sa piramide. Nakaadto man ko didto. Ngani ang pagkabuhat niini dili gyud masundog bisan hangtud sa karong panahon. Wala man kita’y mga makinarya nga arang makatukod og piramide, walay mga enerhiya (gawas sa pang-atomika nga enerhiya) nga arang makatukod og piramide, tungod kay daku man kaayo kini. Ang mga bato pa gyud motimbang og mga tonelada ug mga tonelada ug mga tonelada, nga ginaalsa ra, og naka-kamada nga ingon ka haum nga bisan ang manipis nga sulab sa pang-ahit dili mahimong. . . Ug wala kini naka-semento, kondili gipangtapyas kini aron nga motakdo gayud ang tagsa-tagsa ka bloke.

⁵⁴ Ug kinahanglan ingon niana usab ang Lawas ni Jesus Cristo, ingon niana mismo ang pagkatapyas niini sa Balaang Espiritu, pinaagi sa dakung Instrumento ug Galamiton sa Dios, aron mamahimo kitang mahiusa ingon nga usa ra ka Persona. Dili kita nagkabahinbahin. Kinahanglan usa ra kita ka Persona! Ug nagapakita ra kana nga wala gyu’y makinarya ang makabuhat sa ingon niana. Ang Dios ang gikinahanglan nga mobuhat niana. Walay mga mekanika sa organisasyon, walay mga kapunungan, wala ni usa sa niining mga butanga ang makabuhat niana, bisan unsa pa ka maayo ang ilang mga katuyoan. Dili gyud sila makabuhat niini, tungod kay ang Dios man mismo ang gikinahanglan nga mobuhat niini, ang Balaang Espiritu.

⁵⁵ Dili ko sigurado kon aduna ba ko'y kuwartang dolyar sa akong bulsa. Apan adunay...Oo, anaa, duna diay ko'y kuwartang dolyar. Pasensya na. Sa luyo niining kuwartang dolyar inyong makita ang selyo sa Estados Unidos diha sa wala nga bahin, nga nakalantaw kaninyo. Dinhi sa ako, anaa kini sa wala nga bahin; diha sa inyo, anaa kini sa tuo. Kini ang agila. Ug usab anaa dinha ang coat of arms ug uban pa. Apan sa *niini* nga bahin dinhi, sa tuo nga bahin, nako, inyong makita ang piramide. Ug inyong mamatikdan, sa ibabaw sa piramide mao ang batong-pangtaklub, ug dinha sa ubos niana nagaingon nga, "Ang Halangdon nga Selyo." Bisan sa atong panalapi, ginaila nato kana. Wala gyu'y ateista ang makapukan sa Cristianismo. Ngani ang matag sulat nga inyong ginasulatan og petsa, nagapahinungod kana sa adlaw sa pagkahimugso sa atong Ginoo. Ang matag kalendaryo, ang tanan-tanan nagahisgot gyud mahitungod Kaniya. Ug bisan diha sa atong panalapi, ang Pangulong-bato, mao si Cristo! Nganong wala pa nila kaha gipahimutang ang pangulong-bato diha sa piramide? Tungod kay gisalikway man ang Pangulong-bato sa dihang miabot Kini.

⁵⁶ Apan karon, sumala sa propesiya, moabot ra ang Pangulong-bato. Ug gusto kong himatikdan ninyo nga, pagmoabot na ang Pangulong-bato, ang principe nga magamantala sa Mensahe magatuaw og "Grasya! Grasya!" Tungod pinaagi man sa grasya kita nangaluwas, dili tungod sa mga buhat, aron nga walay bisan kinsa nga magapangandak. Ug ang Mensahe sa grasya dugay nang giyatak-yatakan sa mga tawo hangtud nga nahimo kini nga kaulawan. Ang uban kanila napahilayo na paingon sa Eternal nga kasiguradohan, ang uban misimang paingon sa bisan unsa na lang. Pero, ang tinuod nga Mensahe sa grasya nagapabilin gyud nga mao sa gihapon, ug dinha ginapaningkamotan nga isimang ni Satanas ang Iglesia. Apan pinaagi ra sa grasya sa Dios nga kitang tanan nangaluwas.

⁵⁷ Busa diha sa pagka-Dios ni Jesus Cristo, kung mahimong moanhi ang Ginoong Dios ug panghimatud-an nga mao kana ang Kamatuoran, dili lang kana, apan pinaagi sa Iyang Pulong mismo ginapanghimatud-an Niya nga kini mao ang Kamatuoran, ug pinaagi sa mga ilhanan ug mga katingalahan ginapanghimatud-an pud Niya nga mao kini ang Kamatuoran, ug, usab, Kamatuoran man ang grasya. Kung ingon-ana nganong makahimo man ang si bisan kinsa nga mangsaway ug moingon nga ang grasya sayup, nga "kono kita nangaluwas pinaagi sa mga buhat"? Kita nangaluwas pinaagi sa grasya, pinaagi'g pagtoo, dili pinaagi sa mga buhat. Ang mga buhat nagapakita ra nga luwas ka na. Apan ang makaluwas kanimo mao ang grasya sa Dios. Ang grasya ang nagaluwas kanimo. Grasya ang maoy ginabuhat sa Dios para kanimo. Ang maayong mga buhat sab mao ang imong ginabuhat para sa Dios, aron sa pagpakita og

pagpasalamat sa kung unsay gibuhat sa Dios para kanimo. Apan pinaagi sa grasya ikaw gayud naluwas!

⁵⁸ Ang ubang mga tawo gadahum nga, “Aba magpamiyembro ra ko sa iglesia, ipalista ko ang akong ungalan diha sa libro, mao lang kana ang kinahanglan kong buhaton.” Ang ubang mga tawo gadahum nga, “Aba nagasinggit man ako, mao lang kana ang kinahanglan kong buhaton.” Gadahum pud ang uban, “Aba nagasulti man ko og laing mga dila, mao lang kana ang kinahanglan kong buhaton.” Gadahum sab ang uban, “Aba aduna man ko’y gahum para ayohon ang mga may sakit, mao lang kana ang kinahanglan kong buhaton.” Dili gyud kana ingon-niana! Ang grasya ra sa Dios ang nagaluwas kanimo, ang makahibulongang grasya sa Dios. Dili gyud ko makasalig sa unsa man nga mga nabuhat nga kaayohan. Ang uban miingon pud, “Bueno, anaay usa ka halangdon nga tawo. Kana nga tawo, nadungog ko na siya nga mibarug ug gibuhat ang *ingon-ini*, nadungog ko na siya nga mibarug ug gibuhat ang *ingon-ana*.”

⁵⁹ Ang ingon ni Pablo, diha sa Unang Mga Taga-Corinto 13, “Bisan kung ako magasulti og mga dila sa mga tawo ug sa mga Manulonda, bisan kung aduna ako’y pagpang-ila, bisan kung aduna ako’y mga gasa, para magpakaon, gamiton ko ang tanan kong mga katigayonan para mapakaon ang mga kabus, bisan kung makapabalhin ako og mga bukid pinaagi’g pagtoo, bisan kung aduna ako’y kahibalo aron masabtan ang tanang butang, wala ako’y kapuslanan hangtud nga magaabot ang gugma, nga mao ang grasya.” Ang Dios ang gikinahanglan nga mobuhat niana. Mahimo mo man ang tanan niining mga butanga ug malaglag sa gihapon. Ang grasya gyud ang nagaluwas kanimo, ang grasya sa Dios alang sa kaliwatan sa tawo.

⁶⁰ Ang hunahunaon Siya mismo! Namalandong ko sa gilayon bahin niana nga grasya human nga mitungha kadto niadtong Biyernes sa buntag, sa mismong pagbanagbanag sa adlaw, didto sa umahan sa diha nga milingkod ako sa usa ka troso, pagkahuman niadto, ug midagayday ang mga luha sa akong mga mata. “Oh Dios, mipaubos ang Imong grasya aron luwason ako. Unsa ba’y hinungdan nga nalooy Ka sa usa ka kabus, og walay- edukasyon nga sama nako mismo? Daw sa unsa nga mikanaug Ka nganhi sa among ubos og gamay’ng tabernakulo, kon diin anaa ang kalinaw, ug mga tawo nga may ubos ra nga matang sa panginabuhi, mga kabus, og walay unsa man dinhi niining kalibutana, ug bisan pa niana ang Imong grasya gikabubo gayud nganhi sa among mga kasingkasing, pinaagi sa Balaang Espiritu, nga Imong giayo ang among balatian ug giluwasa ang among sala, giluwasa kami sa among mga sala, diay, ug gihimo kaming Imong mga katawohan, og nakighilambigit kanamo?”

⁶¹ Dayon nahunahuna ko usab si David, kon daw sa unsa nga sa dihang gitinguha niya kaniadto nga magpatukod og usa ka balay alang sa Ginoo, og miingon, “Dili angay kanako nga mopuyo sa

usa ka balay nga binuhat sa cedro, ug ang Arka sa pakigsaad sa akong Dios tinabonan ra og panit sa mga karnero ug anaa ra sa usa ka tabernakulo.”

⁶² Gisultihan sa Dios ang propeta, “Lakaw suginli ang Akong alagad, nga si David, gikuha Ko siya gikan sa toril sa mga karnero, gikan didto sa pagpakaon niadtong pipila ka mga karnero sa iyang amahan, ug ‘gibuhat ka nga bantugan nga ngalan sama sa dagkung mga tawo sa yuta.”

⁶³ Namalandong ako sa grasya sa Dios, daw sa unsa nga mahimo Niya kana, nga mahimo Niyang luwason ang si bisan kinsa! Ug dayon gipili pa ang usa ka kabus og alaut nga sama nako, ug gihatagan ako og kahigayonan para iwali ang Maayong Balita ug aron makasaksi nga mangaluwas usab ang uban, masaksihan sila nga nangaayo; masaksihan nga ang mga panimalay nga nabungkag, mahipasig-uli pag-usab; masaksihan ang mga kinabuhi nga nangadaut, nga maihusto pag-usab. Ug ang mahatagan gayud ako og grasya! Nahunahuna ko, “Oh, makahibulongang grasya!” Dayon giadtoan pa ang usa ka dautan, og ubos ra nga mangangayam og squirrel didto sa kakahoyan, ug giporma ang Iyang Kaugalingon diha sa porma nga *balangaw*, nga nagakahulogan og usa ka “pakigsaad,” nga hatud ang usa ka Mensahe nga gikahatag Niya kanako aron igawali, ug giporma kini didto nga usa ka pakigsaad, ingon nga Siya ang nagapaluyo Niini! Ug Siya gayud ang magapaluyo Niini, tungod kay ang Mensahe iya man ni Jesus Cristo ug sa Iyang kahimayaan.

⁶⁴ Daw sa unsa nga Iya akong gitugotan nga magsangyaw sa tanang dapit sa kalibutan, sa tibuok kalibutan, sa mga kanasuran, sa minilyon nga mga tawo, nasaksihan ang minilyon nga nangduol sa Ginoo ug gidawat Siya ingon nga ilang personal nga Manluluwas, nasaksihan sila nga napuno sa Iyang kamaayo ug gibalaan sila pinaagi sa Iyang gahum, nasaksihan sab sila nga nangaayo pinaagi sa Iyang gamhanan nga gahum. Dayon mosinggit ako nga sama sa propeta, ug moingon, “Dili pinaagi sa gahum, ni pinaagi sa kusog, kondili pinaagi sa Espiritu sa Dios.” Dili pinaagi’g edukasyon, dili pinaagi’g teolohiya, kondili pinaagi sa Espiritu sa Dios nga ginaluwas Niya ang mga tawo. Pinaagi sa Espiritu sa Dios nga ginaayo Niya ang mga tawo. Ang Espiritu sa Dios ang nagahatag og Mensahe ngadto sa mga tawo. Ang Espiritu sa Dios mao ang nagapanghimatuod sa Pulong.

⁶⁵ Aduna kita og mga teologo sa karon, aduna kita og mga Doktor sa Divinidad, aduna pud kita og bantugang mga kalalaken-an sa tibuok kalibutan, nga mga maantigo, maalamon ug edukado. Apan gikinahanglan man ang kayano para toohan ang Dios, aron ipamulong ang Iyang Pulong, aron maipakita nga si Jesus Cristo mao sa gihapon kagahapon, karon, ug hangtud sa kahangturan. Gikinahanglan ang mapainubsanong kasingkasing nga napahinungod gyud sa Dios, aron dalhon

si Jesus Cristo nganhi sa karon. Amen! Kung teolohiya man ang gikinahanglan, sama nga aduna ang mga Presbyterian, Methodist, Baptist, Katoliko, ug uban pa; kung ingon-niana wala gyud kita'y kahigayonan, kita nga mga tawong kabus og walay-nakat-onan. Apan dili man kahiralo ang mao'y gikinahanglan. "Dili pinaagi sa gahum o pinaagi sa kusog, kondili pinaagi sa Akong Espiritu," ang ingon sa Dios, "igapadayag Ko kining misteryo." Ug, "Siya magatuaw og, Grasya, grasya, uban ang mga pagsinggit ug mga paghilak." Ingon niana usab karong panahona, ang makahibulongang grasya sa Dios para sa Iyang mga katawohan. Kung giunsa Niya pagpili ang mga walay-kahiralo, og walay-nakat-onan, nagapakita mismo kini nga si Jesus mao ra sa gihapon.

⁶⁶ Kaniadtong mianhi Siya, wala gayud Siya miadto sa mga bantugang teologo. Wala sab Siya miadto kang Caifas, ang labaw'ng sacerdote; para lang pagahukman niini.

⁶⁷ Kondili gipili Niya ang mga mangigisda, mga tawong kabus ug mga nagkinabuhi ra og yanong kinabuhi. Ug kanila gipadayag Niya ang Iyang Kaugalingon, ug miingon, "Sumunod kamo Kanako, ug himoon Ko kamo nga mga mangingisdag tawo," nga nagapakita gayud nga ang Iyang grasya miabot sa gihapon gikan sa mga Judio paingon sa mga Gentil, aron magtawag og usa ka katawohan alang sa Iyang Ngalan sa niining kaulahiang mga adlaw, ingon nga bag-ohay lang natong gihisgotan kini. Makahibulongang grasya, pagkatam-is nga tingog!

⁶⁸ Karaan na ang grasya. Ang grasya maingon na ka karaan sama sa kalibutan. Ngani unang naipakita ang grasya ngadto sa kaliwatan sa tawo kaniadtong nagsugod ang kaliwatan sa tawo. Sa diha nga gilalang kaniadto ang tawo didto sa tanaman sa Eden, niadtong mangitngit nga buntag sa diha nga milagpas ang gamay'ng babaye niadtong utlanan nga nagapahimulag, ug misupak sa Kasugoan sa Dios ug gidani ang iyang bana nga buhaton ang mao usab nga butang, og niadtong tungora mismo nalapas ang kasugoan. Ang kasugoan kinahanglan adunay silot kay kon wala pa nan dili kini kasugoan. Ug ang kasugoan mao ang, "Sa adlaw nga kamo mokaon niini, kana nga adlaw kamo mamatay gayud."

⁶⁹ Timan-i n'yo, nga ang unang hukmanan anaa sa yuta, ug anaa kadto sa tanaman sa Eden kaniadto. Ug ang ulahing hukmanan maanaa gihapon sa yuta, sa katapusang panahon, diha na sa Maputi nga Trono.

⁷⁰ Apan sa dihang mikanaug kaniadto si Jehovah, akong mahanduraw nga wala gayu'y ni usa ka bitoon nga midan-ag, mangitngit na kaayo didto sa gamay'ng mahayag kaniadto nga tanaman, tungod ang sala man ang nagpangitngit niadto, og nagwangtang sa Kahayag gikan sa ilang taliwala.

⁷¹ Ingon niana usab ang nagakahitabo sa mga kaiglesiahan karong panahona. Ingon niana usab ang nagakahitabo sa mga tawo karong panahona. Gitabonan sa sala ang Kahayag nga iya sa buhi nga Dios, aron maipakita unta nga si Cristo mao sa gihapon kagahapon, karon, ug hangtud sa kahangturan, ug Siya'y buhi gayud aron luwason ang si bisan kinsa, ug aron ayohon bisan ang pinaka-maluyahon, og masakiton nga tawo.

⁷² Oh, pagkamakalilisang niadto nga buntag, tungod milukop man ang kangitngit didto sa tanaman! Akong mahanduraw ang panganod nga maitum sama sa maitum nga panapton. Mahanduraw ko nga wala gayu'y dahon nga milihok. Walay hangin nga mihuyohoy. Mangitngit gayud ug makalilisang, tungod sa sala nga mitabon.

⁷³ Didto mikanaug si Jehovah sama sa usa ka dinahunog sa dalugdog, nga nagalakaw didto sa tanaman, nagasinggit, "Adan, hain ka man?" Mao na kadto ang higayon nga naamgo ni Adan nga siya'y hubo diay ug nakasala sa atubangan sa Dios. Mao nga mitago siya ug misulay sa paghimo para sa iyang kaugalingon og usa ka relihiyon, apan wala kadto nagpulos. Ang Dios nagpatay hinoon og usa ka karnero, gikuha ang mga panit niini, ug nagpakita kadto nga aduna gyu'y butang nga kinahanglang mamatay ingon nga pangtabon sa sala.

⁷⁴ Ang pagpamiyembro sa iglesia dili makatabon sa sala. Ang walay luha nga pagsugid dili makatabon sa sala. Pagbalata ug paghinulsol ang gikinahanglan, ug ang grasya sa Dios, aron matabonan ang sala; ang Dugo ni Jesus Cristo, ang Usa nga gipatay sa Dios didto sa Kalbaryo, aron mao'y magatabon sa sala.

⁷⁵ Didto sa tanaman niadtong buntaga, sa diha ang sala ingon ka maitum gayud, miabot si Jehovah. Atua nagatindog ang Iyang magtiayon, nga hinukman na. Wala na unta ang kaliwatan sa tawo, tungod nga kinahanglan man sila nga mamatay; ang kamatayon sa tawo, mao na unta ang magpabalik sa kalibutan ngadto sa mga mapintas nga mananap tungod mawala na man ang kaliwatan sa tawo. Apan niadtong pinakamangitngit nga takna, niadtong higayon nga wala na gayu'y paglaum, gibubo ang grasya, og miingon, "Hatagan Ko kamo og usa ka Manluluwas, usa ka Mesias." Oh, pagka-kahibulongan gayud nga gibuhat kadto sa Dios! Ang makahibulongang grasya sa Dios didto sa tanaman sa Eden, ang naghatag kanila og saad mahitungod sa Maong Matarung Nga magaabot pinaagi sa babaye. "Ang Binhi sa babaye nga maoy magasamad sa ulo sa serpente," nga maoy pinakasad-an, "ug ang ulo sa serpente ang magasamad sa iyang tikod," aron maipakita nga magkaaduna og pag-antus ang Iglesia. Apan bisan pa niana nagsaad man Siya og kadaugan! Unsa man ang nagtagana og Manluluwas? Ang grasya!

⁷⁶ Unsa man ang mahimo nilang ipakita para mamahimong takus sa maong grasya? Unsa ma'y mahimo nilang ipakita nila aron mamahimong takus niadto? Sumala sa sinultihan sa kasundalohan, pasayloa ko niini, gusto ko lang isulti kini dinhi sa akong pulpito aron maghimo og usa ka punto, “ang pagpinasahay og basul.” Miingon si Adan, “Ang babaye man nga Imong gihatag kanako ang nagbuhat niini.” Miingon pud ang babaye, “Gilimbongan man gud ko sa serpente.” Gipasangil na kadto sa usa ngadto sa usa pa. Wala na gyud unta'y paglaum para kanila kaniadto.

⁷⁷ Apan nagtagana ang Dios og grasya, ug diretsong miabot kadto! Ug miingon Siya, “Apan maghimo Ako og paagi, bisan pa man. Luwason Ko kamo, bisan unsa pa'y mahitabo. Nakahimo kamo og sayup, gilapas ninyo ang Akong kasugoan. Ang Akong kasugoan magpabilin ra, ug ang paghukom sumala sa Akong kasugoan kinahanglan gyud nga mamatuman. Busa moresulta gyud kini og kamatayon, tungod kay nagsulti man Ko og ‘kamatayon.’”

⁷⁸ Karon, mga higala kong Cristohanon. Ug kining mga teyp nga gipang-rekord dinhi mokaylap mismo sa tibuok kalibutan. Tugoting hangyoon ko kamo og usa ka butang, kamong mga gapaninguhang himoon ang Dios ingon nga tulo ka Dios, o kamong mga gapaninguha nga himoon Siya nga usa, nga sama sa inyong tudlo. Siya'y usa ra gyud ka persona!

⁷⁹ Dili husto para sa Dios nga himoong usa ka Anghel ang mamatay. Dili Siya mamahimong husto nga matang sa Maghuhukom kon himoon nga usa ka Anghel ang mamatay para sa tawo. Dili kana sa gihapon ang mahimong pang-sulbad niadto, tungod kay ang halangdon Niyang kasugoan nagkinahanglan man og kamatayon, ug mao nga kinahanglan aduna gyu'y mamatay, ug dili man puede nga usa ka Anghel ang mamatay. Dili sab Siya puedeng moingon, “Eva, tungod kay ikaw man ang hinungdan nga gibuhat kadto ni Adan, nan himoon Ko nga ikaw mamatay, og tugotan nga mabuhi si Adan,” tungod kay nakaambit man usab si Adan.

⁸⁰ Sama sa giingon sa usa ka tawo, “Gimatarung na man si Pilato, mao gani nga nanghunaw siya sa iyang mga kamot.” Dili n'yo mahimong manghunaw para matangtang ang Dugo ni Jesus Cristo gikan sa inyong mga kamot. Dili kamo puedeng mobiya niini nga bilding karong buntaga ug mahiadto sa Langit, kung mamatay kamo nga anaa kaninyo ang inyong mga sala. Kini anaa gihapon diha sa inyong mga kamot. Busa, dili kana husto.

⁸¹ Aduna lamang og usa ka matarung nga paagi. Aduna lang og bugtong paagi nga mahimong, matuman ang mga gikinahanglan, sa halangdong kasugoan sa Dios. Kinahanglan Siya Mismo ang motuman niini. Kinahanglan Niya nga buhaton kini. Ang Dios usa man ka Espiritu ug dili Siya mahimong

mamatay. Busa kinahanglan Niya uná nga mahimong tawo, ug mao nga namatay Siya sa tawhanong unod, diha sa porma sa usa ka tawo nga ginganla'g “Jesus Cristo,” ug mao kadto ang gikasaad nga Mesias nga nagdala sa maong grasya. Dinha ninyo makita nga ang Dios ug si Cristo mao ra diay mismo nga Persona, ang Dios nga nagapuyo diha kang Cristo. “Ako ug ang Akong Amahan Usa ra, ang Akong Amahan nagapuyo Kanako; dili Ako ang nagasulti sa Pulong, kondili ang Akong Amahan nga nagapuyo Kanako.” Ang Dios nga anaa kang Cristo! Sigurado gayud.

⁸² Gikasaad ang grasya didto sa tanaman sa Eden, ug miabot ang maong grasya, ang grasya nga para kang Adan ug Eva. Wala na unta'y kapaingnan, wala na'y kaadtoan ug bisan pa niana naghimo gyud og paagi ang grasya!

⁸³ Isulti ko kini, akong higalang makasasala. Mahimong ania ka niining buntaga ingon nga usa ka bigaon, mahimong ania ka niining buntaga ingon nga usa ka babaero, mahimong ania ka ingon nga usa ka palahubog o usa ka sugarol, o kaha usa ka mamumuno. Tingali'g ania ka ingon nga usa ka dili-putli nga bana, usa ka dili-putli nga asawa. Tingali'g ikaw na ang pinakadautan nga makasasala. Moingon ka, “Milagpas na man ko siguro nianang punto nga puede pang matubos.” Dili, dili pa, o wala ka unta karon dinhi sa simbahan karong buntaga. Ang grasya magahimo mismo og paagi alang kanimo niining mangitngit nga takna kung dawaton mo lang kini. Kinahanglan ni Adan kaniadto nga andam siya mismo nga dawaton kini, mao usab kamo. Dawata n'yong kini.

⁸⁴ Ang grasya sa Dios miabot sab sa panahon ni Noe. Si Noe, ingon nga usa lamang ka ordinaryo nga tawo, siya ug ang iyang pamilya. Apan tungod kay gikahadlokán ni Noe ang Dios, gitoohan niya ang Dios! Dili ka man mahadlok sa Dios kon wala ka nagatoo. Unsaon mo man pagkahadlok sa usa ka butang nga wala nimo toohi? Kinahanglan mo uná nga kahadlokán ang Dios. Miingon si Solomon, “Ang pagkahadlok sa Dios mao'y sinugdan sa kaalam.” Bueno, sa pagkahadlok lamang sa Dios, nagasugod ka nang makabaton og kaalam. Ug sa pagkahadlok sa Dios, gikahadlokán ni Noe ang Ginoo ug gitoohan niya ang Ginoo. Ug mao kana ang ginapasidunggan sa Dios, ang inyong pagtoo Kaniya. Husto kana. Dayon sa dihang miabot kang Noe ang pagkahadlok sa Dios, gitawag siya sa Dios pinaagi sa grasya, ug giluwás siya ug ang iyang panimalay tungod kay grasya man ang nagpahinungdan niadto. Dili tungod kay si Noe usa ka bantugan og mas guwapo nga tawo kay sa tanang uban pa kanila, dili tungod kay nagatambong si Noe sa pinakamaayong iglesia sa nasud kaniadto, dili tungod kay miyembro siya sa pinakamaayong organisasyon, dili tungod kay mas nindot siyang mangbisti, dili tungod kay mas daghan siya'g kuwarta, dili tungod kay usa siya ka espesyal nga tawo. Kondili tungod gayud

sa grasya sa Dios, nga giluwes sa Dios si Noe. Grasya ang nagluwas kang Noe (dili ang iyang mga buhat; kondili ang grasya gyud sa Dios) ug ang nagluwas usab sa iyang pamilya.

⁸⁵ Hinganlan nato ang usa pa ka tawo kon diin gikahatagan usab og grasya sa Dios, daghan man kanila, pero maghisgot lang ta og pipila. Si Abraham. Si Abraham, nga dili espesyal nga tawo, nga naggikan sa tore sa Babel, tingali'g migawas siya gikan sa pundok nga nagasimba'g-dios-dios (sa iyang amahan), og miadto didto sa yuta sa Shinar, aron mopuyo sa siyudad sa Ur. Ug samtang atua siya didto, nakigsulti ang Dios kaniya tungod sa grasya. Dili tungod kay lahi siya, dili tungod kay mas maayo siya nga tawo; kondili, tungod sa grasya, nga gitawag siya sa Dios. Klaro man kana nga gipadayag sa Biblia. Oh, si Abraham, daw sa unsa nga gisulayan ni Abraham ang pailub sa Dios! Gisultihan na siya, giingnan nga, "Abraham, magpabilin ka dinhi niining yutaa, ayaw gyud pagbiya niini." Apan sa dihadiha nga miabot ang kagutom, mikalagiw si Abraham.

⁸⁶ Ngani si Abraham nagahisgot man mahitungod sa ato. Gipili sa Dios—gipili sa Dios si Abraham tungod sa grasya, ug giluwes siya. Ug ingon niana usab ang paagi kung giunsa Niya kamo pagpili, tungod sa grasya. Ug sa unsang paagi nato ginasulayan ang Iyang pailub? Karong adlawa madasigon kita, pagkaugma nagkaluya na kita. Usa ka adlaw nagatoo kita, pagkasunod adlaw nagaduhaduha na kita. Karong adlaw usa kita ka Methodist, pagkaugma usa na pud kita ka Baptist. Karong adlaw nagatoo kita sa Balaanong pagpang-ayo, pagkaugma misakit lang ang tiyan ug wala na kita kabalo kon nagatoo ba kaha ta niini o wala. Apan bisan pa sa tanan niana, ang gusto sa Dios nga magpabilin gyud unta kita. Tungod ginaluwas man Niya kita, bisan pa man. Kung dili pa tungod sa grasya sa Dios, kitang tanan wala na gyud unta. Oo. Ginaluwas kita sa Dios pinaagi sa Iyang grasya.

⁸⁷ Dapat nagpabilin ra unta si Abraham niadtong yutaa, apan miadto man hinoon siya ngadto sa mga Caldehanon, o, dili diay sa mga Caldehanon, kondili sa mga Filistihanon. Miadto siya aron mopuyo didto, aron makalingkawas sa dakung kagutom. Medyo malisud man gud ang kahimtang sa iyang nasud kaniadto, busa mipanaw siya didto uban kanila. Gibuhat mismo ang gisulti sa Dios kaniya nga dili angay'ng buhaton, apan bisan pa niana nagpakita gihapon kaniya ang grasya sa Dios, og gipugngan si Faraon nga pa-. . . o ang—o ang hari nga pangasawon ang iyang asawa. Grasya sa Dios. Sa dihang miingon si Abraham, "Ako kining igsoon," nga namakak mahitungod niadto, apan nagpabilin sa gihapon ang grasya sa Dios kaniya tungod kay naghinulsol man siya. Andam siya kaniadto nga maghinulsol.

⁸⁸ Ug ang si kinsa man nga andam usab nga maghinulsol, ang grasya sa Dios magaabot sa gihapon kaninyo. Ang grasya sa Dios

nagapangita alang kaninyo. Busa, ingon niana usab kaninyo nga mga nag-backslide niining buntaga, nagapangita sa gihapon ang grasya sa Dios kaninyo. Kung maghinulsol lang kamo, igo gayud ang grasya sa Dios.

⁸⁹ Daw sa unsa nga gikuha sa Dios ang buutang tigulang nga si Abraham, og gipabalik siya! Ug timan-i n'yo, nga si Abraham wala naluwas pinaagi sa iyang mga buhat, kondili naluwas siya pinaagi sa grasya. Naluwas si Abraham pinaagi'g pagtoo, nga mao ang grasya. Ug giluwat sa Dios si Abraham tungod sa Iyang grasya, dili tungod sa pamatasan niini. Kondili Iyang giluwat siya tungod sa Iyang grasya. Oh, pagkanindot gayud! Naluwas siya pinaagi sa grasya.

⁹⁰ Atong hisgotan ang Israel. Aduna ko'y usa ka Kasulatan nga naisulat dinhi. Gisulat ko kini ug mahimo ko ra man nga masaulo kini sa akong hunahuna. Pero kung gusto n'yong isulat kini, maanindot pud kini nga hinumduman kung gusto ninyo, Deuteronomio 7:7. Gikahatag sa Dios ang Iyang saad kang Abraham, o dili diay kang Abraham gikahatag, pasayloa ko, gikahatag ngadto sa Israel. Ug gisultihan sila, "Kung dili kamo makighilambigit sa pagsimba-og-dios-dios! Kung dili ninyo pagabuhaton kining mga butanga! Kung mopahilayo kamo gikan sa tanan niining paganong mga seremonya! Kung buhaton ninyo ang tanan niining mga butanga, nan dalhon Ko kamo sa usa ka maayong yuta, atimanon Ko kamo, pakanon Ko kamo, pangunahan Ko kamo. Buhaton Ko kining mga butanga kung buhaton pud ninyo ang ingon niini-ug-ingon niana, kung higugmaon n'yo Ako, kung pagabantayan n'yo ang Akong mga Sugo, ang Akong mga balaod, ang Akong mga kasugoan. Buhaton Ko ang tanan niining mga butanga kung aduna sab kamo'y pagabuhaton, ug bantayan n'yo ang Akong mga Sugo ug higugmaon n'yo Ako."

⁹¹ Sama lang sa usa ka bana nga nagapili og usa ka mapangasawa, ug nagaingon, "Kung mamahimo kang usa ka buutan nga babaye, kung atimanon mo ang panimalay, kung magmatinuuron ka kanako, kung ipapabilin mo nga limpyo ang akong mga sinina; kung makabaton na kita og mga anak, ug mamahimo kang usa ka inahan para kanila; kung pagabuhaton mo ang mga ingon-ining butang, motrabaho gyud ako hangtud nga magdugo ang akong mga kamot, sa pagpanginabuhi para kanimo, kung buhaton mo usab kini." Apan, hunahunaa, unsa kaha kung masayup kana nga babaye, magapuyo na lang nga tapulan, dili na molihok, og wala na'y unsa man nga buhaton? Kung ingon niana grasya na ang gikinahanglan aron mapapabilin nga nahiusa kana nga pamilya.

⁹² Oh Dios! Gikinahanglan usab ang grasya ni Jehovah aron mapapabilin nga mahiusa ang Iyang pamilya. Ug sa ingon niana lang nga paagi nga kita mao'y pamilya ni Jehovah karon, tungod

sa grasya ni Jesus Cristo; kay kung dili pa wala na unta kitang tanan. Apan tungod sa grasya, oh, grasya!

⁹³ Karon, apan wala man nila kadto natuman. Ug sila, wala man sila nakadangat sa bug-os nga saad; wala na nakadangat kadto nga henerasyon. Wala gayud, tungod ang gikasaaran sa maong saad, nangamatay man didto pa sa kamingawan. Apan nagpakaon baya ang Dios kanila, giatiman sila sa Dios, gihigugma sila sa Dios, namuhat gayud Siya. Ngano man? Tungod sa Iyang grasya, Iya kadtong grasya tungod sa Iyang saad, Iyang saad kadto, ang grasya nga naga-uban sa Iyang saad. Apan wala gyud nila gihapon nabatonan ang bug-os nga benebisyo sa yutang saad.

⁹⁴ Ug wala usab nabatonan sa niining iglesia ang bug-os nga benebisyo niini. Ang grasya sa Dios mao lang ang nagapapabilin kanato. Tungod gusto man Niya nga magkaaduna og usa ka iglesia nga motuman Kaniya, usa ka katawohan nga motoo sa Iyang Pulong ug moingon “Mao kini ang Kamatuoran,” bisan unsa pa man ang inyong organisasyon. Gusto Niya og usa ka katawohan nga dili moingon, “Bueno, pareho ra ko ka buutan nimo. Presbyterian ako, Methodist ako, Katoliko ako, pareho ra ko ka buutan nimo.” Dili ingon niana ang grasya; nagapakita hinoon kana nga aduna gyu’y butang nga sayup.

⁹⁵ Apan ang usa ka tawo, bisan unsa pa man, nga mobasa sa Pulong sa Dios ug masabtan nga kinahanglan mo gayud nga matawo pag-usab ug mapuno sa Espiritu Santo, toohan nila kana, dawaton nila kana ingon nga sumala sa Pulong. Dawaton nila ang Pulong sa eksakto gayud kung unsa ang ginaingon Niini.

⁹⁶ Sama sa mga pagbautismo ug pagwisik-wisik; husto man ang bautismo. Pero walay si kinsa man diha sa Biblia ang giwisik-wisikan sukad, wala gyu’y ingon niana nga butang diha sa Kasulatan. Wala usab og si bisan kinsa nga nabautismohan sukad-sukad sa ngalan sa “Amahan, Anak, Espiritu Santo,” diha sa Biblia. Silang, tanan, nabautismohan gyud sa Ngalan ni Jesus Cristo. Busa wala ni usa, walay bisan usa ka tipik sa kasaysayan para . . . Kung aduna ma’y makapakita sa bisan asa, bisan asa diha sa kasaysayan, diin gikabautismohan ang si kinsa man nga tawo diha sa Biblia, o tulo ka gatus ka tuig human sa pagkamatay sa kaulahiing tinun-an, hangtud sa iglesiang Katoliko, kung aduna ma’y makapakita sa bisan asa nga ang si kinsa man nga tawo giwisik-wisikan o gikabautismohan sa ngalan sa “Amahan, Anak, Espiritu Santo,” hangtud sa iglesiang Katoliko, nan obligado ang imong kalag sa pagduol og pagsulti kanako. Wala gyud kana dinha. Apan unsa ma’y atong ginabuhat?

⁹⁷ Natun-an na nato *Ang Mga Kapanahonan sa Iglesia* ug atong nasayran kon diin nila gibuhat kana. Busa, nakita n’yo na,

ang gusto sa Dios mao ang usa ka tawo nga motuman gyud Kaniya. Kung wala kana diha sa mga Kasulatan, nan dili kana sa usa ka tawo. . . usa ra kana ka hinimo'g-tawo nga doktrina ug dili nga Doktrina sa Biblia. Kita n'yo? Busa bisan unsa pa man ang iglesia, og kung unsa ka man ka sayup, unsa ma'y kalahian niana? Ang mahinungdanon mao'y sa kung unsa ka na ka nahimong husto sa karon! Gipakita na kini sa grasya sa Dios kaninyo, nan dinha kamo magalakaw. Grasya sa Dios!

⁹⁸ Hinumdumi n'yo si Moises, usab, kadtong halangdon nga lider. Patyon na unta siya sa Dios sa dihang miadto siya didto aron himayaon ang iyang kaugalingon pinaagi sa pagbunul niadtong Bato, ug miingon, "Kita n'yo na kung unsa'y mahimo kong buhaton?" sa laing pagkasulti. "Kamong mga masupilon, angay ba nga kami ang magpaagay og tubig para kaninyo gikan niining Bato?" Ug iyang gibunulan Kadto ug wala miagay ang mga tubig; gibunulan niya Kadto pag-usab. Unsa ma'y gibuhay niya? Gipamatud-an niya nga dunay kaluyahon si—si Cristo, tungod kay si Cristo man kadtong maong Bato. Mao kadto ang Pangulong-bato. Imbis nga bunalan kadto, o magsulti ra unta niadto. . .

⁹⁹ Gibunulan na Kadto sa makausa. Timan-i n'yo, nga gisultihan sa Dios si Moises dinha sa Exodo, "Lumakaw ka ug Ako magabarug sa atubangan—atubangan nimo, dinha sa maong Bato, ug bunali ang Bato." Ug gibunulan niya ang Bato ug nagpaagay Kadto og mga tubig. Miingon ang Dios, "Sa sunod nga higayon, lakaw og magsulti ka lang sa Bato ug magapaagay na Kini sa mga tubig Niini."

¹⁰⁰ Apan gusto mang ipakita ni Moises nga aduna siya'y diyutay'ng pagbulot-an, diyutay'ng gahum, busa miingon siya, "Hatagan ko kamo og tubig gikan niining Bato." Patyon na unta siya sa Dios, tungod niadto. Ipahimulag na unta siya sa Dios, tungod nga gilapas man niya ang balaod sa Dios didto mismo, tungod kay gipahayag niya nga dunay kaluyahon si Cristo, mao nga gikinahanglan na hinoon Siya nga bunalan sa ikaduhang higayon. Usa lamang ka higayon gibunulan si Cristo. Sa karon mosulti ra kita ngadto sa Bato, ug magapaagay na Kini sa mga tubig Niini.

¹⁰¹ Apan unsa man kadto? Susihon ta ang maong tigulang nga tawo, usa na ka gatus ug baynte ka tuig ang iyang pangidaron kaniadto.

¹⁰² Adunay miingon kanako dili pa lang dugay, miingon, "Ang Dios usa man ka dili-matarung nga Dios," miingon, "tungod kay gipalaw ra Niya si Moises. Human nga siya naghago uban sa mga Hebreohanon sulod sa kuwarenta ka tuig didto sa kamingawan, gipalaw ra Niya siya ug unya wala man gani siya gitugotan nga makaadto sa yutang saad."

¹⁰³ Ingon ko, “Oh, binuang!” Wala, wala gayud Niya gipalaw si Moises. Ngani nakaabot man siya sa yutang saad. Mga pito ka gatus ka tuig human niadto, nakita siya didto sa ibabaw sa Bukid sa Pagkabalhin, siya’y ingon ka buhi sama kaniadto, nga nagatindog, nagapakigsulti kang Jesus sa wala pa si Jesus miadto sa Kalbaryo, siya ug si Elias, magkauban nga nagatindog, og nagapakigsulti, usab. Nagpakita man si Moises ug si Elias ngadto kang Jesus, Pedro, Santiago ug kang Juan, sa Bukid sa Pagkabalhin. Dili siya patay. Siya’y buhi. Wala siya gipakyas sa Dios. Atua man siya sa Palestina.

¹⁰⁴ Karon matikdi, sa wala pa siya namatay, misaka siya sa Bukid sa Nebo, niadtong buntag nga hingsayran niya nga motaliwan na siya. Iyang gihukasan si Aaron, gipasul-ob ang mga bisti niini ngadto sa uban. Gihukas pud niya ang iya mismong kupo, gipasul-ob kadto kang Josue, og gimandoan si Josue nga magpabilin gayud sa mga kasugoan! Ug sa pagsaka niya didto sa ibabaw sa Bukid sa Nebo, milatas siya sa kapatagan sa walog, ingon nga nanghibalo na nga mosaka siya didto aron mamatay, ug misaka siya sa Bukid sa Nebo, ug paingon sa Pisga. Ug samtang atua siya didto, miingon ang Dios, “Lantawa ang maong yuta. Gusto Ko nga imong makita kini. Moises, makadangat man gyud unta ka dinha. Apan kabalo ba ka sa imong gibuhat didto sa maong Bato niadtong adlaw? Gihimaya mo ang imong kaugalingon.” Sa tan-aw ko ingon niana usab ang dakung problema sa kadaghanan kanatong mga tawo. “Miadto ka didto sa Bato, ug gihimaya mo ang imong kaugalingon.” Apan matikdi nga sa dihang andam na siya nga mamatay kaniadto, atua mismo ang maong Bato. Tingali’g nakatunob siya ibabaw mismo sa maong Bato didto sa Pisga, ug gilubong na siya sa Dios. Apan siguradong nabanhaw siya, sa kon asa man, tungod kay buhi man siya. Usa siya ka tipo ni Cristo. Atua siya, nga nagatindog ibabaw sa Bukid sa Pagkabalhin, gatasan ka mga tuig human niadto, didto sa Palestina. Kita n’yo, ang grasya sa Dios ang nagtagana sa maong Bato. Oh, my!

¹⁰⁵ Pagmahunahunaan ko si Abraham, ang mahitungod sa tanang mga sayup nga iyang nahimo, ug si Moises usab ug ang iyang sayup, apan sa dihang nahisulat na ang pagsaysay mahitungod kang Abraham, sa dihang nahisulat na ang Balaanong pagsaysay, sa dihang gisulat ni Pablo ang pagsaysay mahitungod kang Abraham, wala gyud siya naghisgot ni usa ka butang mahitungod sa dili-pagtoo ni Abraham. Wala, wala, wala man la’y giisip kaniya. Ingon siya, “Si Abraham wala nagduhaduha sa saad sa Dios tungod sa kakulang-sa-pagtoo, kondili nagmalig-on, nga nagahatag og pagdayeg ngadto sa Dios.”

¹⁰⁶ Ang akong mapaubsanong pag-ampo nga, sa atubangan sa grasya sa Dios nga ania niining buntaga, nagalaum ko nga

mahisulat pud unta ang sa akoa nga mamahimong sama niana, nga dili Niya makita ang akong mga sayup. Nga sa dihang mahisulat na ang pagsaysay mahitungod kanako, sa akong pagkamatay, nga unta dili kini mabasa ingon nga nakahimo ko og mga sayup ug nakabuhat og sayup, kondili Iya lamang makita ang mga butang nga gipaningkamotan kong buhaton alang Kaniya. Hinaut nga ang mga niini mamahimo lamang. . . Unsa ma'y makapahimo niana? Iaplikar Niya ang grasya sa Dios nga akong ginatoohan. Ug dinha lamang ako nagasalig. Kay kung ibasi lang sa akong mga nabuhat nga kaayohan dili gyud ako makasulod sama sa tanang uban pa, apan sa grasya lang sa Dios ako nagasalig. Oo, grasya ang akong ginasaligan.

¹⁰⁷ Dihay usa ka Bato didto sa dihang andam na nga mamatay si Moises kaniadto.

¹⁰⁸ Unsa man usab ang masulti nato mahitungod kang David? Ang grasya sa Dios! Kadtong bantugan nga manggugubat kang kinsa ang Dios Mismo. . . miingon Siya, “Usa siya ka tawo nga tukma sa Ako Mismong kasingkasing.” Kadtong bantugang manggugubat, nga si David, unsa ma'y hinungdan nga nabuhat niya ang ingon niadtong butang, para kuhaon si Uriah, nga iyang sundalo, sa dihang aduna man unta siya'y daghang mga Gentil nga mga sundalo didto? Paminaw og ayo sa niining hamubong sugilanon sa makadiyut lang. Sa dihang atua na ang ilang mga sundalo didto, ug si Uria mao ang usa nga miunong kang David. Si Uria usa ka kinabig, usa siya ka Hetehanon, usa ka kinabig ngadto sa relihiyong Judio. Ug gihigugma gayud si David niadto nga mga tawo! Nakita man nila ang pagdihog nga anaa kaniya, bisan pa nga usa siya—usa siya ka layas kaniadto. Tungod nga gipalagpot siya gikan sa iya mismong nasud, og mipuyo uban sa mga Filistihanon. Gipapangita siya ni Saul. Apan bisan pa niana kadto nga mga tawo, nakita nila mismo nga ang pagdihog anaa kaniya! Nasayod sila nga magahari gyud siya. Himaya sa Dios!

¹⁰⁹ Malipayon gayud ako ingon nga usa karon ka tawong-sinalikway, tungod kay nasayod man ko nga moabot si Cristo aron mamahimong Hari. Bisin iboto n'yo pa ang tanang mga Kennedy ug unsa pa man nga gusto ninyo. Apan si Cristo ang mamahimo gayud nga Hari! Ang pagdihog anaa Kaniya, sa Iyang Mensahe mahitungod sa Iyang Pag-abot. Ug Siya'y mamahimo nga Hari!

¹¹⁰ Unsa ma'y gibuhat nila? Usa niana ka adlaw atua si David nga gustong moinom unta og tubig nga gikan pa didto sa ganghaan sa Betlehem, kon diin siya nagaadto kaniadto para magbantay og mga karnero. Ug kabalo ba mo kung unsa? Ang duha niadto nga mga kalalaken-an nagdala og espada ug gipangtigbas ang mga kaaway samtang nagapanaw sila og kinse ka milya, aron lang magkalos og usa ka timba sa tubig para kang David. Tungod, ngano man, ang iyang pinakagamay'ng tinguha usa na ka sugo ngadto kanila. Hunahunaa n'yo kana! Ug ilang

palatas nga ginapangtigbas ang mga kaaway, hangtud ngadto sa ibabaw niadtong bukid diin gikaingon nila nga atua kono siya didto, mga kinse ka milya sab kadto. Gilatas nila kadto. Ug pag may tawo nga motungha, mopakig-away sila niini hangtud nga mapatay nila kini. Pero padayon ra gyud silang nagpanaw! Ug dala-dala nila kining timba ug nagkalos og usa ka timba sa tubig, ang maong duha ka lalaki, didto mismo sa natad sa mga kaaway, aron lang magkalos og mainom nga tubig, para sa ilang hari, para sa ilang igsoon. Sa dihang, aduna man unta'y tubig nga iyang mainom didto, apan *kadto* gyud nga tubig ang iyang gusto.

¹¹¹ Oh Dios, tugoti akong gamiton ang Espada sa Pulong ug latason ang tanang organisasyon, aron madala ko ang bautismo sa Ngalan ni Jesus Cristo, ug ang Gahum sa pagkabanhaw ug ang Espiritu Santo, pabalik ngadto sa mga tawo, bisan unsa pa ang. . . tungod kay magahari man Siya. Magahari gayud Siya, mobarug Siya nga mag-inusara. Apan pagabuntogon usá Niini ang matag organisasyon, buntogon ang matag teorya, ang matag kredo nga hinimo-sa-tawo, hangtud nga mapahibalik mo ngadto sa Manluluwas ang usa ka karnero nga nahisalaag, ang tawo, nga mahibalik pag-usab sa mga Doktrina sa Biblia, nga si Jesus Cristo mao sa gihapon kagahapon, karon, ug hangtud sa kahangturan. Ang grasya sa Dios!

¹¹² Matikdi n'yo si David. Unsa kaha ang hinungdan nga iyang nabuhat. . . Aduna gani siya og usa nga miambak sa gahong ug gipatay ang usa ka leon. Grabe kadtong gibuhat ni David nga giilog niya ang asawa ni Uria, ang maanyag nga si Bathsheba, sa dihang aduna na man siya og lima ka gatus nga asawa? Pero pagkakita niya sa maong babaye nga naligo. Ug tungod sa pagpasagad ni Bathsheba. Bueno, nalimtan lang kono niya nga ipaubos ang mga tabil sa dihang naligo siya, nga unta nasayod man siya nga nagaadto ang hari didto, nagaagi didto, sa kada adlaw, didto dapit niadto nga paril.

¹¹³ Mao ang problema. Sa hunahuna ko ang mga kababayan-an sa karon dili man ingon nga nagpasagad gyud o ingon-niana, bueno, kondili basta nalang silang nagagawas nga mga hubo, kana lang, diha sa mga kadalanan, nga nanagsul-ob og mugbo nga mga bisti. Kaulawan kana! Ug dayon matingala pa sila kon nganong ang mga kalalaken-an kono mangserbato ug managhoy. Aba, ginabuhat man nila kana aron nga managhoy ang mga lalaki ug kung unsa na lang ang buhatan. Hingsayran na nila kana, aduna man sila'y igong pagsabot aron ilang masayran kana. Ginabuhat nila kana tungod kay gusto man nila. Anaa na kana sa ilang kasingkasing. Pag sultihan mo sila nga sila'y mga imoral, makiglalis pa sila bahin niana. Hinoon mahimong dili sila mga imoral, mahimong ingon gayud sila ka putli sama sa usa ka lirio, kung paghisgotan ang pagpakighilawas. Apan, timan-i, nga aduna gyu'y espiritu diha kanila, kanang pagdihog nga iya sa yawa, nga mao'y nagahatud sa kalag sa usa ka

lalaki ngadto sa impiyerno. Timan-i n'yo, nga miingon ang Biblia, "Ang si kinsa man nga nagatan-aw sa babaye, nga may pangibog kaniya, nakapanapaw na uban kaniya sa iyang kasingkasing." Ug timan-i sab, igsoong babaye, nga manubag ka gayud tungod sa pagpanapaw bisan pa og wala mo nabuhat kana nga aktuwal sa tibuok mong kinabuhi, apan kanang makasasala nga mitan-aw kanimo tungod sa imong pagpangbisti, nan sad-an ka gihapon sa pagpanapaw. Manubag ka gayud sa Adlaw sa Paghukom, tungod sa pagpanapaw. Sa diha nga moingon siya . . .

114 Ang ingon Niya dinhi, nga isulat Niya sa Iyang Basahon, "Nakapanapaw."

"Kang kinsa?"

"Mrs. John Doe."

"Dayon, Mrs. John Doe, unsa man kana?"

115 "Ginapanumpa ko nga ako . . . Kabalo man ka sa akong kaagi, nga wala gyud ako nakigpuyo sa ubang lalaki gawas sa kaugalingon kong bana."

116 "Apan tungod sa imong pagpangbisti mao nga ikaw ang naghinungdan nga nakapanapaw kining maong lalaki. Ug sad-an ka sa pagpanapaw uban kaniya. Mao kana ang higayon nga nabuhat niya kana. Ikaw ang angay'ng pagabasulon, tungod ikaw man mao ang nagpasundayag sa imong kaugalingon."

117 Nakabuhat gyud og sayup si Bathsheba sama ra ni Eva nga nakabuhat pud og sayup kaniadto, apan nahiapil man niadto si Adan. Sa hunahuna ko kanunay ra natong ginasaway ang mga kababayan-an, usab. Pero kamong mga anak sa Dios, nga mga kalalaken-an. Nasayod kong kamo man ang pinakamaligon nga grupo, husto kana, kamo ang mas malig-on. Kamo ang mas lig-on kay sa mga babaye, tinuod kana, busa manglihok unta mo nga ingon niana. Ayaw n'yo silang daugdaugon, nga dili seryosong makig-relasyon sa usa ka mahuyang nga babaye ug dauton lang ang kinabuhi niini. Kondili magmahimo gayud nga usa ka anak sa Dios, sultihi siya nga sayup siya, ug magbarug nga sama sa usa ka anak sa Dios. Siya'y imong igsoong babaye. Oo, sir. Pero ang ginapaninguhaan natong buhaton, sa mga anak kono nga lalaki sa Dios karong panahona, nga miyembro pa sa mga iglesia, makig-relasyon sila sa matag mahuyang nga babaye kutob sa ilang mahimo. Timan-i, ang hinungdan nga adunay usa ka imoral nga babaye kay tingali'g dunay usa ka minyo na nga lalaki ang nagdaut kaniya, usab. Busa, dili mahimong tawgon sa kaldero nga maitum ang takuri, mao nga timan-i n'yo kana. Ang sala gayud ang mao'y nagpahinungdan nianang tanan. Ug mao nga kitang tanan mapailalum sa kamatayon, ug kinahanglan mamatay tungod niana.

118 Sa dihang nabuhat ni David kadtong dautan nga butang, mamatay na unta siya sa iya mismong paghukom mahitungod

niadto. Sa dihang miadto ang propeta didto, nagdahum gyud si David nga nalilong ra niya kadto. Sa diha nga miadto didto kadtong propeta ug mitindog sa iyang atubangan, ingon ang propeta, “David, okey ra ba ang tanan?”

Miingon, “Okey ra man ang tanan.”

¹¹⁹ Si David, nga nakasul-ob sa hatag-as niyang kupo ug dakung korona, ug gipadala niya didto si Joab, ang iyang bantugan nga heneral, ug sigeng nagapadayon ang grabe nga pagpakiggubat. Napapabilin niya ang tanang mga kaaway nga halayo ra sa mga utlanan ug uban pa, mao nga okey ra gyud ang tanan. Nakabaton na siya og anak pinaagi niining Bathsheba. Ug gipadala pud niya didto ang luoy’ng si Uria, ug gipatindog si Joab sa kiliran niini, hangtud nga gibiyaan kini ni Joab. Ug—ug—ug namatay si Uria sa pagsalop sa adlaw, samtang gigunitan niini ang espada nga gigamit sa pagpakiggubat, dugoan ang kalasag niini, tungod sa iyang pagpakig-away alang sa Israel, bisan pa nga siya’y usa ra ka kinabig ngadto sa ilang relihiyon. Dayon sa nakabalik na si Joab ug gisultihan siya nga—nga namatay si David. . . nga—nga namatay na si Uria, naghunahuna si David, “Okey na gyud ang tanan karon. Nailog ko na ang iyang asawa, ug mamahimong okey na ang tanan. Nakabaton na pud ko og anak.” Apan nagkasakit man ang maong bata. Hinay-hinay nga nagpinal ang bata. Ug gibuhat niya ang tanan-tanan nga mahimo niya aron lang masalbar ang kinabuhi sa bata, tingali’g gipaadtoan na sa tanang doktor. Pero wala gihapon nagpulos. Sa katapusan, namatay gyud ang bata. Ngani nahadlok pa silang isulti kang David nga patay na ang bata. Ug namatay man ang bata. Dayon nagdahum gyud si David nga nalilong ra niya ang tanan. Busa iyang gihupay si Bathsheba. Human na niyang gipangasawa si Bathsheba kaniadto, bisan pa duna na siya og tanan niadtong ubang mga asawa niya.

¹²⁰ Kining tigulang nga propeta, opawon nga lalaki, ang tigulang nga si Nathan, mitungha kini didto nga gikan pa sa kamingawan, milingkod, og miingon, “David, kumusta man ang tanan-tanan?”

¹²¹ Miingon, “Maayo! Maayo ra man! Tigulang nga propeta sa Dios, mabuhi ka hangtud sa kahangturan! Alleluyah!” Oh, siya gayu’y . . . Nagdahum gyud siya nga okey ra ang tanan, nagdahum siya nga maitago ra niya kadto.

¹²² Apan wala ka’y puedeng itago sa Dios! Nasayod Siya sa kung unsay imong ginahunahuna karon mismo. Nasayod Siya sa imong mga hunahuna, tungod kay Dios Siya. Ang Balaang Espiritu nga ania sa bilding karong buntaga, nasayod gyud sa inyong mga hunahuna, sa kung kinsa kamo, kung taga asa kamo, og kung unsay inyong nabuhat, tungod kay si Jesus Cristo mao man sa gihapon kagahapon, karon, ug hangtud sa kahangturan.

123 Gipadayag kadto sa Dios sa maong propeta. Ingon niya, “David, adunay usa ka tawong dato nga nagpuyo sa *niini* nga bahin sa dalan, aduna siya’y daghang mga karnero, oh, siya’y dato kaayo. Aduna usab og usa ka tawo nga nagpuyo sa *niini* nga bahin sa dalan, kabus siya, og aduna siya’y usa ra ka karnero. Pero giatiman niya kini nga sama sa usa ka anak nga babaye. Ginapakaon niya kini gamit ang mao ra nga kutsara nga ginagamit niya sa iyang pagkaon. Nagakatulog siya uban sa maong karnero. Ang tanan-tanan ingon gayud ka. . . Mora na kini og iyang anak nga babaye. Ug usa niana ka adlaw dunay miabot nga usa ka bisita, ug, imbis nga mokuha ang tawong dato og usa sa iyang mga karnero ug magpahigayon og kumbira para sa maong bisita, bueno, imbis nga ingon niana, miadto man hinoon siya ug giilog ang karnero sa tawong kabus, ug pinaagi og puwersa, giilog niya ang karnero ug gihaw kadto, ug nagpahigayon og kumbira.”

124 Bueno, ingon niadto ang mga pangibog ni David. Aduna man unta siya’y lima ka gatus nga asawa, apan sa dihang nakita niya ang asawa ni Uria, imbis nga mokuha siya og usa gikan sa iyang lima ka gatus nga asawa, aron sa paghupay o pagtagbaw sa iyang mga pangibog, miadto hinoon siya, og giilog ang asawa niining maong lalaki, dayon gipapatay si Uria sa diha nga naburos na si Bathsheba. Wala gyud nasayod si David niadtong tungora sa iyang ginabuhat, aba, andam na unta siyang magpahayag sa iyang paghukom. Ingon niana sab kita. Mahimo ra nato sa kanunay nga hukman ang ubang tawo, apan kung sa ato na, oh, lahi na kana.

125 Miingon si David, “Bayaran kini mismo sa maong tawo pinaagi sa iyang kinabuhi.”

126 Nangingkit ang mga mata, niadtong tigulang nga propeta. Ingon niya, “David, siguradong dili ka mamatay!” Matikdi n’yo ang grasya nga namuhat sa gilayon didto. Ang Espiritu mikunsad sa maong propeta, og naluwat ang kinabuhi ni David. Tungod sa grasya, “Siguradong dili ka mamatay, apan ang espada dili mobulag gikan sa imong balay hangtud nga mahinlo na og ayo ang imong kasingkasing. Kay, ikaw man kadtong tawong dato.” Oh, nalahi gyud pagkahuman niadto, dili ba?

127 Unsa ma’y nakaluwas kang David, sa diha nga miingon ang iya mismong paghukom, “Mamatay ang maong tawo! Bug-os gyud siya nga magbayad, ug bayaran niya kini pinaagi sa iyang kinabuhi”?

128 Ug miingon ang propeta, “Sigurado (tungod sa grasya) dili ka mamatay. Dili ka mamatay, David. Grasya ang nagluwas kanimo.” Ang grasya kadto, para kang David, ang nakaluwas kaniya. Oh, my!

129 Kung dili pa lang tungod sa grasya, asa na kaha kitang tanan karon? Husto ba kana? Sigurado gayud.

¹³⁰ Ang gamhanan nga grasya nagagikan man sa Usa ka gamhanan usab. Gamhanan nga grasya gikan sa Usa ka gamhanan. Ingon nga gamhanan, unsa ma'y mamahimo niini? Makahimo ang gamhanan sa bisan unsa ma'y gusto niini. Paminawa n'yo kini ha. Ang Usa ka Gamhanan lamang ang makahatag og gamhanan nga grasya. Ug Gamhanan man ang Dios, mao nga makahatag Siya og gamhanan nga grasya. Busa ingon nga Gamhanan, ang grasya dili na kinahanglan pa nga mananghid kang bisan kinsa, dili niini kinahanglan nga mananghid pa. Kondili ginabuhat niini kung unsa man ang gusto niini. Dili ba pagkaanindot niana? Dili na niini kinahanglan nga mananghid, "Puede ko bang buhaton *kini*? O, buhaton ko ba *kini*? Mahimo ko ba? Kinahanglan ko ba? Puede ba?" Dili kini ingon niana. Nagapamuhat kini mismo. Gamhanan ang grasya, busa mahimo Niyang luwason ang pinakadautan, mahimo Niyang luwason ang pinakangil-ad, mahimo Niyang luwason ang pinakahugaw, mahimo Niyang luwason ang pinaka-imoral, mahimo sab Niyang ayohon ang pinakamasakiton. Alleluyah!

¹³¹ Mahimo pud Niyang luwason ang usa ka alaut nga sama kanako. Ug giluwason Niya ako. Unsa man kini? Grasya! Si William Branham, nga anak sa usa ka palahubog. Wala kana'y diperensiya, tungod grasya man sa Dios ang nagluwas kanako!

¹³² "Ako, anak baya ko nga babaye sa usa ka babaye nga dili maayo." Wala kana'y diperensiya, tungod ang grasya mismo sa Dios ang nagluwas kanimo. Gamhanan kini, og dili na kinahanglan nga mananghid pa kang bisan kinsa. Amen! Nalipay gyud ako niana. Alleluyah!

¹³³ Mahimo usab niini nga pilion ang pinakadautan nga makasasala ug pagapapution siya sama sa niyebe, og dili na kinahanglan nga mananghid pa kang bisan kinsa mahitungod niana. Oh, mahimo Niini kana tungod kay gamhanan Kini. Paminaw mo, sa gilayon karon.

¹³⁴ Napamatud-an na kana didto sa krus, sa dihang atua ang pinakadautan nga kawatan, og angayan ra siya nga mamatay kaniadto. Wala gani sukad-sukad misantop sa iyang hunahuna ang Dios. Wala gayud siya naghunahuna og unsa man mahitungod Niini. Didto sa krus sa diha nga, kadtong dugoan niyang mga ngabil, taliwala sa iyang mga pag-agulo mitingog kini, "Ginoo, malooy Ka kanako!"

¹³⁵ Ug dihay Usa usab nga mitubag bisan taliwala sa Dugo, mga luha, pag-antus, miabot ang grasya ug miingon, "Karon mahiuban ka Kanako sa Paraiso." Grasya ang namuhat niadto. Unsaon man sa maong kawatan pagtabang sa iyang kaugalingon? Pareho ra usab ni Adan kaniadto nga dili niya matabangan ang iyang kaugalingon, pareho ra ni Eva nga dili matabangan ang iyang kaugalingon, pareho ra nga dili n'yo usab matabangan ang inyong kaugalingon, pareho ra nga dili ko usab

matabangan ang akong kaugalingon, sama ra usab nga dili nato maipataas ang atong mga kaugalingon ngadto sa Milky White Way pinaagi sa kaugalingon natong mga pagpaningkamot. Dili gyud nato kana mabuhat. Apan ang grasya sa Dios aduna gayu'y mabuhat niana, ug mamuhat mismo kini! Ang grasya sa Dios, ang pagkagamhanan sa grasya sa Dios, miabot niadtong naghimalatyon na nga kawatan, "Karon magauban ka Kanako sa Paraiso." Oh, palandunga n'yo kana! Pagkaanindot niana.

¹³⁶ Palandunga n'yo kini: ang Gugma ug ang grasya managsoon ra, kaluha nga managsoon. Dili mo mahimong maangkon ang grasya nga wala ang gugma. Sila'y kaluha man nga managsoon. Husto gayud. Adisir ka makabaton og grasya, kinahanglan mo 'una nga makabaton og gugma. Adisir ka makapakita og kamaayo sa usa ka tawo, gihigugma mo uná sila; husto man o sayup, kinahanglan mong higugmaon sila, bisan pa man, kay kung dili nan dili ka usab makapakita og kamaayo. Kita n'yo? Busa ang gugma ug ang grasya managsama ra. Sila'y kaluha nga managsoon, ingon niana gayud, ang gugma ug ang grasya. Sila, kita mao'y... Dili nato makita ang usa nga wala ang laing usa. "Gihigugma sa Dios ang kalibutan, mao nga gihatag Niya ang Iyang bugtong Anak," gibubo Niya ang Iyang grasya, ug gihatud kini sa atong mga kasingkasing pinaagi sa Espiritu Santo. Kita n'yo? Wala ka gayu'y mahimo kung wala ang pagpakitimbayayong nianang usa ngadto sa usa pa. Ang grasya, grasya sa Dios ang nagaluwas kanato.

¹³⁷ Karon hingsayran nato, ang grasya, nga sama niadtong naghimalatyon na nga kawatan kaniadto, dili ikatingala nga nakapadasig gyud kini sa mga magbabalak sa diha nga nasayran nila kini. Ngani miingon ang usa ka magbabalak:

Kadtong naghimalatyon nang kawatan
nalipay nga makita

Kadtong tuboran sa iyang adlaw;

Dinha hinaut ako, bisan ingon ka dautan sama
niya,

Pagahugasan ang tanan kong mga sala.

Sukad-sukad nga pinaagi sa pagtoo nakita ko
kadtong sapa

Nga nagagikan sa Imong nagadagayday nga
samad,

Gugmang nagatubos mao na'y akong tema,

Ug mao sa gihapon hangtud nga ako mamatay.

Kung ingon-ana sa usa ka mas halangdon, mas
matam-is nga awit,

Pagaawiton ko ang Imong gahum sa pagluwas,
Sa diha nga kining luoy'ng yungit,
nagakanganga nga dila

Mopahulay na dinha sa lubnganan.

Grasya, makahibulongang grasya! Alleluyah! Aduna pu'y misulat niini:

Oh, ang gugma sa Dios, daw sa unsa ka madagayaon ug pagkaputli!
Daw sa unsa ka dili-matugkad ug pagkakusgan!
Hangtud sa kahangturan kini magalungtad,
Nga pagaawiton sa mga balaan ug mga manulonda.

Kung ang kadagatan pagapun-on man og tinta,
Ug ang kalangitan ang himoong sulatanan;
Ug ang matag lindog sa yuta ang himoong pangsulat,
Ug ang matag tawo usab ang mamahimong tigsulat;
Apan ang isulat ang gugma sa Dios nga labing-hataas
Makapahubas gayud sa kadagatan;
Ni dili gani mapasigo sa sulatanan ang kinatibuk-an,
Bisan pa nga pagainaton ang tibuok kalangitan.

¹³⁸ Ingon niana, ang grasya, ang grasya sa Dios. Ang grasya sa Dios ang naghatag og landong. . . naghatag ang Dios og grasya sa atong mga kinabuhi tungod sa Iyang gugma para kanato. Ania ang usa pa ka butang nga dili mahimo sa grasya; dili puedeng mapalit ang grasya, dili puedeng mabaligya ang grasya. Tungod grasya kini! Iya kini sa Usa ka gamhanan. Oo, sir. Dili ka puedeng magpakigsabot lang para niini. Moingon ka, “Dios, buhaton ko ang *ingon-ini-ug-ingon-ana* kung buhaton Mo usab ang *ingon-ini-ug-ingon-ana*.” Dili mo kana puedeng buhaton. Dili sab kana buhaton sa Dios. Dili mo gayud puedeng pugson ang Dios. Ginahatag kini kaninyo sa Dios pinaagi sa Iyang grasya. Oh, oh, oh, my!

¹³⁹ “Kini dili sa kabubut-on sa tawo o kaniya nga nagapaningkamot, kondili sumala sa Dios nga nagapakita og kalooy.” Husto kana.

¹⁴⁰ Nanagyukbo ang mga tawo. Ug may pipila ka mga lalaki nga miduol kanako. . . mora'g nakita ko gani ang usa sa maong mga lalaki dinhi sa bilding karon. Usa ka lalaking Methodist nga bag-o pa lang nakatambong, ug nakadawat sa Balaang Espiritu, nga taga. . . Ug kini nga mga lalaki miduol kanako, og miingon, “Karon, Igsoong Branham, karon nga luwas na kami ug nadawat na ang Espiritu Santo, mahimo na ba kaming mohangyo og mga gasa?”

Ingon ko, “Ayaw n'yo kana buhata. Ayaw n'yo kana buhata.”

¹⁴¹ Ginahatag sa Dios ang Iyang mga gasa sumala sa Iyang kagahum. Ang mga gasa ug mga pagtawag wala ma'y pagkabakwi. Mahibaloan mo na lang, pag mosugod kang maninguha og usa ka butang, "Dios, basta himoon Mo lang akong usa ka magwawali, basta himoon Mo lang akong *ingonini*," ug unsa na ma'y mahitabo kanimo? Mamahimo ka lang nga usa ka dakung hambugiro, kana lang. Mapaingon ka lang ngadto sa kung unsa na lang nga iya sa tawo nga teolohiya ug sa kung unsa na lang nga organisasyon, ug didto ka na magpabilin ug magpakadunot. Pasagdi ang Dios nga mao'y magtawag. Kung tawagon ka man sa Dios, pagabalaanon ka sa Dios, og igahatag mismo sa Dios kanimo kung unsa man ang angay Niyang ihatag kanimo. Oo, sir.

¹⁴² Dili ka puedeng magpakigsabot para sa grasya. Dili, sir. Dili mo, kini puedeng ibaligya, dili puedeng magpakigsabot ra alang niini, ni dili kini puedeng paliton, og dili sab puedeng ibaylo. Dili ka puedeng moingon, "Bueno, karon, Ginoo, magpamiyembro ako sa niining dakung iglesiang Baptist, o niining dakung iglesiang Methodist, o niining dakung iglesiang Pentecostal, o kaha niining dakung iglesiang Nazarene. Buhaton ko *kini* kung buhaton Mo lang *kini* para kanako." Dili gyud puedeng magpakigsabot ra alang niini. Dili, sir.

¹⁴³ "Ang tanan nga gikahatag Kanako sa Amahan magaari Kanako. Walay tawong makahimo sa pag-ari gawas kon pagatawgon siya una sa Akong Amahan."

¹⁴⁴ Mamahimo ka lang usa ka miyembro sa nianang dakung iglesia, mao lang kana, pero dili ka maluwas. Grasya ang gikinahanglan nga moluwas kanimo. Ang atong mga talento dili usab makahatag og kasiguradohan, ug ang atong mga talento dili pud mamahimong atong—atong... Ang mga talento nga aduna kita, dili gyud kita makaangkon og grasya pinaagi sa atong mga talento.

¹⁴⁵ Kung gihimo man kong usa ka magwawali sa Dios, dili kana ang nagapakita nga ania kanako ang Iyang grasya. Dili, dili. Tungod ang Iyang grasya lamang mao'y nakaluwas kanako. Dili tungod kay nagawali ako sa Maayong Balita, nga naluwas ako. Dili tungod kay nagasulti kamo og laing mga dila, nga naluwas kamo. Oh, dili. Dili tungod kay ikaw, tungod kay nagawali ka. Wala ka gayud naluwas tungod kay nagawali ka. Ikaw—wala ikaw naluwas tungod kay nagasulti ka og laing mga dila. Wala ka naluwas tungod kay nagabuhat ka sa bisan unsa niining mga butanga. Mao kana'y ginapamatud-an sa Unang Mga Taga-Corinto 13, "Bisan kung ako magasulti og mga dila sa mga tawo ug sa mga Manulonda, bisan kung akong masabtan ang tanan nga mga tinago sa Dios (ingon nga usa ka magwawali), bisan kung akong mabuhat *kinining* tanan, ug bisan aduna ko'y pagtoo nga arang makapabalhin og mga bukid, wala ako'y kapuslanan hangtud nga magaabot ang grasya, nga mao ang gugma." Ang

gugma mao ang grasya. Ang grasya gyud sa Dios ang mao'y nagabuhat sa tanan.

¹⁴⁶ Ang ubang mga tawo, aduna bitaw kamo'y mga talento nga sama niining pipila ka mga hari sa rock-and-roll. Kasukaon gyud ko niana, ambot ba, pag bahin na sa akong espirituwal nga tiyan. Sultihan ko kamo, sa diha nga madungog ko kining rock-and-roll inig ka Sabado sa gabii ug moawit sila og rock-and-roll, ug magsayaw-sayaw tibuok gabii, ug dayon pagkasunod buntag motambong og moatubang sila sa mga nagasimba ug mga butang nga sama niana aron magpakaaron-ingnon nga relihiyoso, ug motindog dinha sa atubangan sa mga tawo ug moawit og usa ka alawiton, ug gadahum nga makaadto sila sa Langit. Mahimo kong magsulti og daghang mga ngalan, apan dili ko na kinahanglang isulti pa. Hinoon mokaylap man kini nga teyp sa bisan asa. Apan nakahibalo na man mo. May usa ka batan-ong lalaki dili pa lang dugay dinhi, sa Hollywood, dili kono siya mohalok sa usa ka dalaga tungod kay supak kono kini sa iyang "relihiyon." Supak kono sa iyang "relihiyon," pero nagahimo diay og mga retrato sa rock-and-roll ug mga butang nga makauulaw gayud, ug mga ingon—ingon nianang butang. Sa hunahuna mo ba nga mapuslan mo pa ang imong katloan ka buok nga salapi ug mamahimong takus diha sa grasya sa Dios, Judas? Wala gyud ka'y mapalit niini gawas sa usa ka dapit didto sa impiyerno para kanimo!

¹⁴⁷ Dili gyud puedeng magpakigsabot alang sa grasya sa Dios, ni mamahimong . . . ni makaangkon niini pinaagi og talento. Gamhanan nga grasya kini! "Wala gayud ako'y madala, sa Imong krus lamang ako nagahawid." Ako'y hubo, samaran, og nagaduol ako kung unsa lamang ako.

Ania ako, nga wala na'y ubang hangyo,
Gawas sa Imong Dugo nga igaula para kanako,
Ug nga Imo akong dapiton nga moduol
Kanimo,
Oh Cordero sa Dios, ako nagaduol!

¹⁴⁸ Mao lang kana, ang grasya mao'y nagdala kanako. Ang grasya gayud. Ang grasya sama lang, sa usa pa ka butang nga buut kong isulti, usahay ang grasya . . .

¹⁴⁹ Kining dagkung mga iglesia, nagahunahuna sila nga pag motambong kamo dinha, gahunahuna nila, "Bueno, kami ang nakapatukod og pinakadakung simbahan sa siyudad. Aduna sab kami dinhi og kapunongan sa mga kababayen-an nga nagahimo para sa mga kabus . . . og mga sinina para sa mga kabus, ug ginapadala kini sa ubang nasud. Ginapakaon pud namo ang mga kabus. Ginabuhat namo *kining* tanan."

Miingon si Pablo, "Mabuhat ko man ang mao gihapong butang, ug mahimong walay kapuslanan."

¹⁵⁰ Ginaingon pud nila, “Bueno, kami, kami’y karaan na nga organisasyon. Milungtad kami dinhi nga duha na ka libo ka tuig. Lima na ka gatus ka tuig ang among gidugayon. Sila ni John Wesley, Alexander Campbell, ug kining halangdon nga mga magtutukod kaniadto, sila ang nagtukod sa among iglesia. Alleluyah!”

¹⁵¹ Bueno, si Jesus Cristo man ang nagtukod niini nga Iglesia, ang bautismo sa Espiritu Santo, ug gisultihan sila kaniadto nga moadto sa Pentecostes ug maghulat hangtud nga madawat nila ang Gahum gikan sa Kahitas-an.

¹⁵² Ug mahimo man ninyong magpasakop sa iglesiang Pentecostal ug mangalaglag sa gihapon. Tungod ang iglesiang Pentecostal pareho ra man sa uban nga iglesia. Husto kana.

¹⁵³ Ang punto niini nga, aduna lamang og usa ka Iglesia, mao kana ang Iglesia diin kamo gikahimugso pinaagi sa bautismo sa Balaang Espiritu, “Kay pinaagi sa usa ka Espiritu kitang tanan gibautismohan ngadto sa usa ka Lawas,” Unang Mga Taga-Corinto 12:13, husto kana, Unang—Unang Mga Taga-Corinto 12. Bueno, gibautismohan kita ngadto niana nga Iglesia.

¹⁵⁴ Apan gahunahuna ang mga tawo nga mamahimo ra silang takus niini. “Aba, kami, ako—nakaeskwela gud ko ug natun-an kong buhaton ang *ingon-niini*, ug nakaeskwela pud ko sa mga seminaryo ug nabuhat ko . . .” Wala kana nagkahulogan ni unsa man. Dili mo puedeng paliton ang grasya sa Dios.

¹⁵⁵ Ingon niini ang grasya sa Dios. Sultihan ko kamo og usa ka sugilanon, sa pagtapos. Ingon niini ang grasya sa Dios. Kaniadto adunay usa ka gamhanan nga hari, ug kining gamhanan nga hari adunay usa ka anak nga lalaki ug iya kining bugtong anak. Ug usa niana ka adlaw gipatay sa mamumuno ang maong batang lalaki. Ug mao nga gipangita sa mga delegado sa tibuok gingharian kadtong mamumuno. Sa katapusan nadakpan gyud nila kadtong mamumuno. Ug sa pagkadakup nila kaniya, gidala nila siya ug gibilanggo siya. Ug sa diha nga ila siyang gibilanggo, may gikatakda nga usa ka pagbista ug pagpahamtang og silot. Oh, makalilisang kaddo. Tungod gipatay man niya ang anak sa hari, ug mao nga nasayod na siya kung unsay mahitabo kaniya.

¹⁵⁶ Gipahimutang nila siya sulod sa bartolina, gitrangkahan nila ang mga pultahan, gibutangan nila kini og mga kandado aron walay si kinsa man . . . may mga bantay pa sa palibot niini, busa masayran nato kung unsa nga matang sa makalilisang nga silot ang mahiaguman niining maong lalaki, tungod sa pagpatay niya sa anak sa hari, ang harianong, anak sa hari. Gipalibotan og mga bantay ang mga pultahan. Gipahimutang siya sulod sa bartolina. Hubo, og walay unsa man nga gisul-ob gawas sa usa—usa ka bahag. Ug atua siya, didto nga napahimutang sa ingon niadto nga kahimutang. Nagakagutom siya, tungod dili man siya

ginahatagan og makaon. Napahimutang siya sa ingon niadto nga kahimtang.

¹⁵⁷ Pagkahuman gidala na nila siya ngadto sa usa ka pagbista. Nakaplagan siya nga sad-an ug napamatud-an nga sad-an. Mao nga gipahamtang ang silot, nga siya'y pagapatyon ilalum sa makalilisang nga silot nga kamatayon, hinay-hinay siyang pagapatyon hangtud nga motaliwan ang mortal niyang kinabuhi. Gihukman na siya sa maghuhukom, og siya gayu'y mamatay. Ug nagpakiluoy pa siya ug mihilak siya, ug ingon siya, "Bisan pa og sad-an ako, bisan pa og sad-an ako, nagbasol gyud ako nga nabuhat ko kadto. Wala ko unta kadto buhata. Pasayloa intawon ako nga nabuhat ko kadto. Sa kalit lang, tungod sa hilabihan nga kasuko, nga nabuhat ko kadto. Pero wala ko gayud tuyoa nga mamaingon niadto."

¹⁵⁸ Usa niana ka adlaw minaug ang hari ngadto sa maong bilanggoan, aron duawon ang lalaki, para sultihan siya, istoryahon siya ug sultihan siya mahitungod sa pagpatay sa kaugalingong anak sa hari, sa bugtong anak nga aduna ang hari. Gipatay man niya ang maong anak nga lalaki. Miingon ang hari, "Mokanaug ako aron istoryahon siya."

¹⁵⁹ Ug sa pagkanaug na sa hari didto, nakita niya kadtong hawla, ang usa ka mora'g nakahawla nga hayop. Nakita niya ang gamay'ng niwang na kaayo nga lawas sa lalaki nga nagbuyod didto sa suok, nga nagahilak. Namiyahok na ang nawong niini, namiyahok ang apapangig niini, nanglawum na ang mga mata niini, puno na sa mota ang mga mata niini, ug namuti na ang tibuok baba niini; tungod nga walay tubig, og naughan na. Nagyukbo kini didto, nga nagahilak. Miingon ang hari, "Tumindog ka." Miduol siya kaniya, ug mitan-aw siya kaniya. Ingon siya, "Nganong gipatay man nimo ang akong anak? Unsa ma'y nabuhat sa akong anak kanimo? Unsa ma'y iyang nabuhat aron mahiagum ang ingon niadto nga kamatayon maingon sa imong pagpatay kaniya, nga giduslak siya hangtud nga mamatay gamit ang usa ka bangkaw?"

¹⁶⁰ Miingon ang lalaki, "Wala, ginoo ko, wala gyud ni unsa man. Tungod lang sa ako mismong pagka-tampalasan, tungod lang sa kaugalingon kong mga pamaagi. Gipatay ko siya tungod kay nasina ako kaniya, ug nasuko ako ug gipatay ko siya." Miingon, "Karon angayan ra pud ko nga mamatay ilalum sa imong hukom, sir. Nasayod ako niana ug takus ra gyud ko nga mamatay. Ang butang lang nga akong ginahilakan, nga pasayloon mo unta ako nga napatay ko ang ingon niadtong harianong tawo, sa walay hinungdan."

¹⁶¹ Mitalikod ang hari ug milakaw, miadto siya sa entablado, ug miingon, "Panasa ang tanang mga rekord!" Kabalo mo, mora lang kini og gilabay ngadto sa dagat sa pagkalimot. "Panasa ang

tanang mga rekord! Iपालigo ninyo siya, hinloi siya. Magpadala ako og bistu para kaniya.”

¹⁶² Pagkataudtaud, dunay usa ka dakung limousine nga miabot sa may ganghaan. Sa pag-abot niini, gibukhad ang karpet paingon sa bilanggoan. Atua nagtindog ang hari sa may tumoy sa limousine, og miingon, “Umari ka, akong anak, ug sakay ka pauli uban kanako ngadto sa palasyo,” og gisul-oban ang iyang abaga og kupo sa hari. Miingon ang hari, “Sukad karon anak ko na ikaw.”

¹⁶³ Tungod kay naluoy man ang hari, ingon niana ang grasya. Ako man kadto, kamo man kadto. Gipatay nato ang Anak sa Dios, tungod sa atong mga sala. Kita’y mga langyaw, mahugaw, malaw-ay, og napahimutang sa bilanggoan sa kalibutan. Pero gihugasan kita sa Dios pinaagi sa Dugo sa Kaugalingon Niyang Anak, ug gilimpyohan kita, og gipasul-ob sa bistu nga iya sa Balaang Espiritu. Ug magaabot ang dakung carro sa Dios sa may ganghaan sa umaabot nga adlaw, ug mopauli kita aron magpuyo na uban Kaniya. Gipapas na ang tanang mga rekord, dili na kita pagahukman pa; gisunog na ang mga niini, gilabay na Niya kini ngadto sa dagat sa kapasayloan ug dili na kini hinumduman pa. Dili ikatingala nga makaawit kita:

Makahibulongang grasya! pagkatam-is nga
tingog,
Nga nagluwas sa usa ka alaut nga sama
kanako!
Ako kaniadto nahisalaag, apan karon ako
hingkaplagan,
Ug buta kaniadto, apan karon makakita na
ako.

Grasya ang nagtudlo sa akong kasingkasing
nga mahadlok,
Sa grasya usab nga nahupay ang akong mga
kahadlok;
Pagkabililhon kana nga grasya nga nagpakita
Niadtong takna nga una akong mitoo!

¹⁶⁴ Dili mo ba tugotan nga mahimong mao na kini ang takna karon mismo, hicalang makasasala, samtang iduko nato ang atong mga ulo sa makadiyut alang sa pag-ampo? Itugot nga mahimong mao na kining taknaa nga una kang mitoo, karon mismo. Magdesisyon ka na, ug moingon, “Ginoong Dios, sad-an gyud ako. Nasayod ako nga grasya ang gikinahanglan aron maluwas ako. Dili ko maluwas ang akong kaugalingon. Nahisalaag ako. Impas na ako. Wala gyud ko’y unsa man nga mahimo. Ako—ako—bug-os gayud ako nga wala na’y mahimo, wala na’y paglaum, kon wala ang Dios, kon wala ang kalooy, kon wala si Cristo, dinhi sa kalibutan, ingon nga ako nahimulag. Malooy Ka unta ug kuhaa ako gikan niining bilanggoan sa

sala nga akong nahimutangan karon, Oh Ginoo? Ug malooy Ka kanako, ingon nga usa ka makasasala.” Mahimo n’yo bang ipataas ang inyong kamot, moingon, “Ginoong Dios, ako kanang tawo nga nanginahanglan sa Imong grasya”? Mahimo n’yo bang ipataas ang inyong kamot, moingon, “Iampo ako, Igsoong Branham, motoo na ako karon”? Panalanginan ka sa Dios dinha sa luyo, igsoon ko.

¹⁶⁵ Aduna pa ba’y moingon, “Igsoong Branham, hinumdumi sab ako karon, sa pag-ampo, oh, igsoon, kung mahimo.” Panalanginan ka sa Dios, gining. “Iampo nga . . .” Panalanginan ka sa Dios, igsoong lalaki. Panalanginan ka sa Dios, igsoong babaye. Panalanginan ka sa Dios, igsoong lalaki, dinhi dapit sa bintana. Panalanginan ka sa Dios, igsoong lalaki, dinha sa luyo. Panalanginan ka sa Dios, igsoong lalaki, ang usa pa, dinhi dapit. “Hinumdumi pud ko, Igsoong Branham.” Panalanginan ka sa Dios igsoon kong lalaki dinha. Oo, ang usa pa dinhi. Panalanginan ka sa Dios, igsoong babaye. Panalanginan ka sa Dios dinhi, igsoong lalaki. Nakita ka Niya karon. Magmatinud-anon gayud. Panalanginan ka sa Dios, batan-ong lalaki. Nakakita Siya, og nakaila usab. Panalanginan ka sa Dios, igsoong lalaki. Panalanginan ka sa Dios, igsoong babaye nga nakasandig diha sa bungbong. Panalanginan ka sa Dios dinhi, igsoong lalaki. Panalanginan ka sa Dios, igsoong lalaki nga nakasandig diha sa bungbong.

Just as I am, without . . .

Aduna pa ba? Panalanginan ka sa Dios. Nakita ko ang imong kamot dinha sa luyo.

But that Thy Blood was shed for me,

Oo, Ginoo. Panalanginan ka sa Dios, igsoong babaye.

And that . . . (Panalanginan ka sa Dios,
igsoong babaye.) . . . Thou bids me come . . .
(Panalanginan ka sa Dios, dinha sa
luyo . . . ? . . .) . . . Thee,

Mag-ampo, mag-ampo, mga Cristohanon.

I . . . (Panalanginan ka sa Dios, batan-ong
babaye.) . . . I come!

Just as I am, and waiting not
To rid my soul of one dark blot,
To Thee, Whose Blood can cleanse each spot,
O Lamb of . . . (Grasya, oh, grasya!) I come! I
come!

¹⁶⁶ Karon, adunay mga kinse o baynte ka kamot ang gipataas. Karon samtang nakaduko ang inyong mga ulo, hangyoon ko kamong nagpataas sa inyong mga kamot, tindog lang mo nga mahilumon karon samtang magaampo ako alang kaninyo. Wala man kita’y igong espasyo dinhi sa altar. Mao nga dili ko na,

mahimong magtawag dinhi. Tindog na lang mo, ang tanan nga nagpataas sa ilang kamot, nga gustong maiampo karon. Tindog mo karon mismo samtang mag-ampo ako. Tindog lang mo, sa kon asa man.

... shed for me,
And that... (Maayo kana, panalanginan kamo
sa Dios...?...))

... bidd'st me come to Thee,
O Lamb of God, I come!

¹⁶⁷ Timan-i nyo, tingali'g moabot ang adlaw sa dihang ang grasya dili na monunot pa, dili na ingon ka madagayaon para kaninyo, og mamahimong ulahi na kini. Karon dili pa man ulahi.

¹⁶⁸ Oh Dios, ang Amahan sa among Ginoong Jesus Cristo, Nga nagbanhaw sa among Manluluwas gikan sa mga patay, og buhi karon, Siya Nga sa hingpit anaa sa Kahimayaan, nga ginapadala ang Balaang Espiritu ni Cristo nganhi kanamo, aron maghatud og kombiksyon para sa makasasala. Dios, nagaampo ako para niining mga tawo nga nagatindog. Kamatuoran kini, Ginoo. Miingon Ka, "Ang magapamatuod Kanako sa atubangan sa mga tawo, pamatud-an Ko usab sa atubangan sa Akong Amahan ug sa balaan nga mga Manulonda." Nasayod kami, nga pagmotindog na kami nianang buntag sa halangdon nga paghukom, pagkagrabe kana nga panahong umalabot. Nagatindog sila karon, Ginoo, aron ang ilang mga sala mapadayag na una kanila; ang mga sala sa uban mapadayag pa lang. Nagatindog kini nga mga tawo dinhi niining buntaga tungod kay ginasugid man nila ang ilang mga sala, ingon nga nahibalo nga nakabuhat sila og sayup ug nagatinguha sila Kanimo ingon nga ilang Manluluwas. Ginasusi Mo ang mga sulod nga tinguha sa mga kasingkasing, ug nasayod Ka sa tanan-tanan mahitungod kanila.

¹⁶⁹ Ginaampo ko, Amahan, nga ihatag Mo unta ang ilang mga hangyo. Luwasa sila. Sila mao ang mga tropeyo sa hamubo nga Mensahe niining buntaga, mahitungod sa grasya sa Dios; bisan unsa pa ang among nabuhat, sa gihapon miabot kini ug gikuha kami. Itugot kini, Ginoo. Ihatag ang grasya sa niini nga mga kasingkasing. Hinaut nga kanunay nilang makita si Jesus ingon nga ilang Manluluwas. Gibuhat na nila ang maong katungdanan. Gisultihan sila sa Balaang Espiritu nga motindog, ug gibuhat nila kini. Gisultihan sila sa Balaang Espiritu nga motindog. Ug sila, ingon nga pagtuman sa Espiritu, nanindog sila.

¹⁷⁰ Karon, Ginoo, ginatuman Mo man ang Imong Pulong. Miingon Ka, "Walay tawong makahimo sa pag-ari Kanako gawas kon pagadanihon siya una sa Akong Amahan. Ug ang tanan nga gikahatag Kanako sa Amahan, magaari Kanako. Siya nga moduol Kanako, dili Ko gayud igasalikway. Siya nga nagapatalinghug sa Akong mga Pulong ug nagatoo Kaniya nga

nagsugo Kanako, adunay Kinabuhing walay katapusan, ug dili na pagahukman sa silot kondili miagi na gikan sa kamatayon ngadto sa Kinabuhi.” Busa, Ginoo, sumala niini nga mga Kasulatan, Imo kining Kaugalingong mga Pulong, Ginoo, nga among ginabasa sa San Juan 5:24, “Siya nga magapatalinghug sa Akong mga Pulong ug magatoo Kaniya nga nagsugo Kanako, adunay!” Ngano man? Tungod kay mitoo man siya, og miduaw kaniya ang grasya. “Mahidangat ngadto sa Kinabuhing walay katapusan, ug dili na pagahukman sa silot (pagalalinon na siya sa dili pa ang paghukom), ug dili na pagahukman sa silot kondili miagi na gikan sa kamatayon ngadto sa Kinabuhi.” Oh Dios, ginapasalamatan Ka gyud namo tungod niini!

¹⁷¹ Ginaampo namo karon nga Imo silang tipigan hangtud nga matapos ang kinabuhi. Hinaut nga silang, tanan, mabautismohan, magatawag sa Ngalan sa Ginoo, nga nagahugas sa ilang mga kasal-anan. Itugot kini, Ginoo.

¹⁷² Karon ginapresentar ko sila nganha Kanimo, ingon nga Imong alagad, nga nagatoo niadtong halangdon nga Manulonda sa Dios Nga nagpakita didto. Ug, Amahan, nasayod Ka man sa kinatibuk-ang estorya, ug sa halangdon nga Manulonda nga nagpakita didto niadtong Biyernes sa buntag, samtang medyo mangitngit pa sa kadlawon, ug gisulti kini nga mga Pulong, diha sa porma sa tulo ka balangaw nga nagagikan sa ibabaw sa bukid. Ginoong Dios, itugot nga ang Dios Nga nagpakita kanako didto sa mga balangaw, tugoti Siya nga luwason kini nga mga tawo, pinaagi sa Iyang grasya, karon mismo. Ginatugyan ko sila nganha Kanimo, sa paglaum nga ginatuman Mo ang Imong Pulong, ug pagatumanon Mo man gyud, ug pagatagboon ko sila nianang halangdon nga adlaw, nga walay ni usa ka buling o kunot sa ilang kalag. Itugot kini. Sa Ngalan ni Jesus, ginatugyan ko sila Kanimo. Amen.

¹⁷³ Panalanginan kamo sa Dios. Karon samtang nagapanglingkod kamo, si kinsa man ang nagalingkod duol kanila nga mga tawo nga Cristohanon, lamanoha n’yo sila. Sultihi sila, dapita n’yo sila sa iglesia, ug unsa pa man, aron mamahimo sila nga . . . Oh, dili ba Siya kahibulongan?

Amazing grace! how sweet the sound,
That saved a wretch like me!
I once was lost, but now I’m found,
Was blind, but now I see.

Was grace that taught my heart to fear,
And grace my fears relieved;
How precious did that grace appear
The hour I first believed!

Mitoo ba kamo? Kung mitoo kamo, ipataas n’yo ang inyong kamot.

Oh, how I love Jesus,
 Oh, how I love Jesus,
 Oh, how I love Jesus,
 Because He first loved me.

When we've been there ten thousand years,
 Bright shining as the sun;
 We've no less days to sing God's praise
 (Salamat sa Dios!)
 Than when we first begun.

¹⁷⁴ Gihigugma ba ninyo Siya? Karon, dili ba Siya kahibulongan?
 Karon:

When . . .

Samtang ginaawit nato kana pag-usab, gusto ko nga makiglamano kamo sa kang kinsa man nga tupad ninyo, sa mahilumon lang nga paagi moingon og, "Panalanginan ka sa Dios, magpapanaw." Nga may pagkamalulot ug pagkabalaan ha.

When we've . . . (. . . ? . . .)

. . . God's praise
 Then when we first begun.

At the cross, at the cross where I first saw the
 Light,
 And the burden of my heart rolled away,
 It was there by faith I received my sight,
 And now I am happy all the day!

Oh, at the cross, at the cross where I first saw
 the Light,
 And the burden of heart rolled away,
 It was there by faith I received my sight,
 And now I am happy all the day!

Wala ba mo malipay?

I'm so glad that Jesus sets me free,
 I'm so glad that Jesus sets me free,
 Oh, I'm so glad that Jesus set me free.
 Singing, glory, Hallelujah, Jesus set me free.

Oh, I'm so glad that Jesus set me free,
 Oh, I'm so glad that Jesus set me free,
 Oh, I'm so glad that Jesus set me free,
 Singing, glory, Hallelujah, Jesus set me free.

¹⁷⁵ Dili ba ninyo Siya ginahigugma? Dili ba Siya kahibulongan?
 Oh, nahunahuna ko gayud nga kahibulongan Siya. Karon, hunahunaa ninyo, nga kining Biblia mao ang Iyang Kamatuoran, ug kining Biblia nagatudlo nga Siya mao sa gihapon kagahapon, karon, ug hangtud sa kahangturan. Aduna ko'y gustong ipangutana kaninyo. Kung Siya mao sa gihapon kagahapon, karon, ug hangtud sa kahangturan . . . pasayloon unta ako sa

Dios tungod sa pagsulti sa maong panamastamas nga pulong, “kung,” apan Siya man mao sa gihapon. Pero kung Siya mao sa gihapon, isulti ko lang kini sa ingon nianang pagkasulti, nan unsa man Siya nga matang sa Persona? Siya’y mao sa gihapon sa kung unsa Siya kaniadto.

¹⁷⁶ Bueno, aduna lang ma’y usa ka butang nga lahi ingon nga ania Siya dinhi niining buntaga kay sa kaniadtong atua Siya sa taliwala sa mga tawo didto sa Galilea, mao kana ang Iya Mismong lawas nga unod, ang Iyang pisikal nga lawas; tungod kay nabanhaw man kadto (nagatoo ba mo niana?), og nagalingkod sa toong kamot sa Halangdon sa kahitas-an, nga buhi sa walay katapusan aron sa pagpangaliya para sa atong mga pagsugid. Timan-i n’yo, nga dili Siya makabuhat og usa ka butang para kanato gawas una nga atong dawaton Siya ug toohan nga gibuhat na Niya, ug isulti nga gibuhat na Niya, kay Siya man mao ang Labaw’ng Sacerdote nga mahimong. . . Siya mao ang Labaw’ng Sacerdote nga nagapangaliya sa atong pagsugid.

¹⁷⁷ Bueno daghan kaninyo nga mga nagabasa sa Biblia ang nagasulti nga Kana nagaingon kono og “pagpahayag.” Ug ang *pagpahayag* ug *pagsugid* mao ra man nga pulong. Kita n’yo? “Nahimo nga Labaw’ng Sacerdote,” diha sa Basahon sa Mga Hebreohanon, sa ika-3 nga kapitulo, “nga nagapangaliya karon sa atong mga pagsugid.” Kung ingon niana wala gyud Siya’y unsa man nga mahimo gawas una nga isugid nato nga gibuhat na Niya kana. Kita n’yo, moluhod ka man dinhi sa altar ug mag-ampo sa tibuok gabii, dili gyud kana makahatag og unsa man nga kaayohan kanimo gawas ‘una nga toohan mong gipasaylo ka na Niya, pagkahuman motindog ka na. Dayon unsa man ka daku ang imong pagtoo, dinha ka. . . Nagkinabuhi ka *dinhi* sa lapuk sa kasal-anan kaniadto. Karon, kamong mga batan-ong kinabig, karon nagatoo man mo nga luwas kamo, dili ba? Busa mipaitaas kamo *dinhi*, mas mipaitaas pa kamo. Unsa ma’y nakapahimo niana? Ang inyong pagtoo, tungod kay nagatoo man mo nga Cristohanon na kamo karon, magkinabuhi na kamo nga mas mataas pa niana nga butang karon. Kita n’yo? Karon kung gusto pud ninyo nga mas mopaitaas pa og dugang, nan magkaaduna lang mo og dugang pa nga pagtoo, tungod kay kini wala ma’y limitasyon, magpadayon lang gayud.

¹⁷⁸ Bueno, oh, ang usa ka imposible puede man mamahimong tinuod. Ang tanang butang mamahimo kanila nga nagatoo. Husto kana. “Kung magaingon ka niining bukid, ‘bumalhin ka,’ ug dili magduhaduha sa imong kasingkasing, kondili toohan nga mamatuman gayud kanang unsa ma’y imong ginaingon, maangkon mo kanang unsay imong ginaingon.”

Karon nagapuyo si Jesus Cristo diha sa mga tawo.

179 Usa ka adlaw kaniadto si Cristo anaa sa usa ka Haligi nga Kalayo, kanang Usa nga makita ninyo nga naretratohan, nagatoo kita nga Kana mao si Jehovah nga Dios. Mao kana ang ginapaningkamotan sa Manulonda nga ipasabot kanato. Bueno, anaa Siya kaniadto diha sa pagka-Amahan, Siya mao ang Amahan sa Israel, ingon nga usa ka nasud.

180 Dayon mianhi Siya ug nagpuyo ipon sa Iyang mga katawhan, ingon nga Cristo, ang Anak. Husto ba kana? Si Cristo mao ang Anak sa Dios.

181 Karon Siya mao si Cristo, nga Balaang Espiritu, nga mao ang Pagdihog. Ang *Cristo* nagakahulogan man nga “ang dinihogan,” ug ang Maong dinihogan sa taliwala sa mga tawo, si Cristo nga uban kanato, ang Balaang Espiritu. Kini mao si Cristo nga uban kanato, ania kanato. Nagatoo ba mo niana? Magmatinahuron gayud sa makadiyut lang, og magmahilum lang. Karon Siya mao ba sa gihapon karon?

182 Sa hunahuna ko nakadawat ako og tawag kaganina, ug miingon nga ang mga tawo kono nagahisgot bahin sa mga lingkoranan ug mga ingon niana dinhi. Hisgotan nato kana unya sa usa ka buluhaton sa simbahan. Busa akong giingnan si Billy, kung mag-ampo ba sila para sa mga may sakit, og kung duna ma’y ingon na niana ka daghan, nan hatagan na sila og mga prayer kard. Ingon niya nga manghatag ra kono siya. Nagtoo ko nga nakapanghatag na siya.

183 Sa nangaging duha o tulo ka bulan man gud, sukad niadtong dunay usa ka butang nga nahitabo, miabot ang ministerio sa punto nga medyo dili ko na makontrolar kini. Nasaksihan nila mismo ang espirituwal na pagpang-ila ug uban pa, kung unsa ang pagpamulong ug pagsulti niini sa mga tawo, nga eksaktong sama gayud sa gibuhat sa atong Ginoo kaniadtong ania pa Siya sa yuta. Kamong tanan nakasaksi na man niini, siguro. Pila ba ang ania dinhi nga wala pa nakasaksi niini o wala pa sukad nakasaksi nga namuhat kini? Tan-awon nato ang inyong mga kamot, ang mga wala pa nakasaksi niini. Oh! Ang wala pa gyud nakasaksi nga namuhat kini. Bueno, dunay usa ka grupo nga ania dinhi nga wala pa nakasaksi niini, siguro mga bag-ohan sila. Wala sab mi kabalo kung taga asa ba ang maong mga tawo.

184 Usa man kini ka tabernakulo nga puedeng manambong ang nagkadaiyang mga denominasyon. Hinoon dili kita supak sa mga denominasyon, pero kita’y—dili usab kita dapig sa mga niini. Pasagdan lang nato sila nga mosubay sa ilang pamaagi. Nagatoo kita sa pag-aghat sa mga tawo. . . Pero kung gusto nila nga mobalik sa denominasyon, okey lang, basta magkinabuhi lang sila og kinabuhing iya sa Cristohanon. Usa lamang—lamang kita ka dapit dinhi nga nagasalbar og mga kalag. Ingon niana ang akong ministerio ganha kanila.

¹⁸⁵ Karon, apan nagatoo pud ko nga nagatudlo ang Biblia, diha sa Mga Hebrehanon 13:8, nga si Jesus Cristo mao sa gihapon kagahapon, karon, ug hangtud sa kahangturan. Nagatoo ba mo niana? Bueno, kung Siya mao sa gihapon. . . Karon samtang nagalingkod kamong tanan nga mahilumon sa makadiyut lang, gusto kong makigsulti kaninyo sa kinasingkasing gayud, ug dayon ipahigayon na nato ang panerbisyo sa pagpang-ayo. Aduna ko'y gustong ipangutana kaninyo. Kung Siya mao ra sa gihapon kagahapon, karon, ug hangtud sa kahangturan, nan giunsa man Niya. . . Ang bugtong paagi nga masulti nato kung ingon niana, kung usa Siya ka Espiritu, magapamuhat Siya sa mao gihapong pamaagi nga Iyang gibuhat kaniadto. Husto ba kana? Mamuhat gyud Siya sa mao gihapong pamaagi nga Iyang gibuhat kaniadto. Giunsa man Niya pagpamuhat kaniadto?

¹⁸⁶ Lahi ba Siya sa ubang tawo? Usa lang man Siya ka tawo, mora lang og usa ka tawo. Usa Siya ka tawo. Gipanganak Siya, ingon nga usa Siya ka tawo. Aduna Siya'y unod ug Dugo. Nag-antus Siya, nag-agulo Siya, nakasinati sab Siya og mga tentasyon. Tungod usa man Siya ka tawo. Husto kana, dili ba?

¹⁸⁷ Apan unsa ba'y nakapahimo Kaniya nga Dios? Kini'y tungod nga ang Espiritu sa Dios anaa man Kaniya. Siya mao ang dinihogan nga Mesias. Ug giunsa man nila pagkaila kaniadto nga Siya mao ang Mesias? Ang ingon ni Moises, "Ang Ginoo nga inyong Dios magpatindog og usa ka propeta nga sama kanako. Ug mahitabo nga ang dili magapatalinghug niini nga Propeta pagapuohon gikan sa kinataliwad-an sa katawohan." Bueno, usa diay Siya ka propeta. Kung ingon-ana nagpaabot ba ang Israel kaniadto og usa ka propeta? Gikinahanglan gyud nila, kung nagapaabot sila sa usa ka Mesias. Ug ang maong Mesias mamahimo mang usa ka propeta.

¹⁸⁸ Karon hisgotan 'sa nato kini sa makadiyut lang, sa pipila ka segundo, ug paminaw mo og ayo. Karon, isentro n'yo ang inyong hunahuna nganha sa Dios, tungod wala kita masayod kung unsay mahimong buhaton sa Dios, wala pud ko masayod kung unsay isulti Niya kanako nga pagabuhaton.

¹⁸⁹ Nasayod ko nga aduna kita og gasa sa pagpropesiya sa iglesia. Ngani ang atong Igsoong Neville, nagapropesiya man taliwala sa mga tawo, og maanindot kana. Ginapasalamatan nato kana. Dugay na kitang nagapahinugod niana sa una pa. Aduna sab kita og pipila dinhi nga nagasulti og laing mga pinulongan. Pero wala kita nagatoo nga gikinahanglan 'una sa mga tawo nga mosulti og laing mga pinulongan aron makabaton sa Espiritu Santo. Wala ma'y ingon-anang Kasulatan bahin sa ingon nianang butang. Apan nagatoo kita nga adunay gasa nga iya sa Espiritu Santo nga nagasulti og laing mga pinulongan, aduna kita niana sa atong iglesia. Pero ginahimo nato kana. . . Wala kita nagabuhat og bisan unsa na lang. Nagatoo kita nga Tingog Kini sa Dios. Nagasulti ra kita sa diha nga mosulti

ang Espiritu Santo, ug ginatugot nato nga mahitabo kana sa makatulo lang ka higayon. Ug kinahanglan kini nga...dili kini angay'ng mahitabo samtang nagawali ako o kinahanglan nga anaa Kini sa kahan-ayan, tungod kay ang espiritu sa mga propeta napailalum man ngadto sa propeta. Kita n'yo? Kinahanglan kining buhaton sa husto nga sumala sa Biblia. Walay si kinsa mang makasulti nga walay ingon-anang butang nga sama sa gasa sa Espiritu Santo ug pagsulti og laing mga pinulongan. Nasayod kita niana. Nagatudlo niana ang Biblia, ug nagatoo kita niana. Ug salamat sa Dios nga aduna kita og ingon-ana sa atong iglesia dinhi! Aduna kita og mga gasa sa pagpropesiya, og gikinahanglan una nga masusi kana ug hibaloong kung husto ba kana o dili, ug dayon ang maong gasa sa pagpropesiya.

¹⁹⁰ Dayon aduna usab og propeta. Karon, kana, bueno mabatonan mo ang usa ka opisina.

¹⁹¹ Ang maong mga gasa, kini silang, mga pagsulti og laing mga pinulongan, ug ang paghubad sa maong mga pinulongan, ug kahibalo, ug kaalam, ug mga pagpang-ila, ug uban pa. Mga gasa kana tanan.

¹⁹² Apan aduna usab og lima ka opisina. Una mao ang mga apostoles, mga propeta, mga magtutudlo, mga ebanghelistas, ug mga pastor. Mao kana ang mga opisina nga gisugo-nang-daan sa Dios. Anaa kana sa mga tawo, kita n'yo. Dili kana, dili mahimong...Dili mo mahimong pangandoyon lang kana, dili mo mahimong mag-ampo para madawat kana; gikahatag kana sa may kagahum, gikahimugso ka diha niini.

¹⁹³ Ang usa ka propeta dili man mahimong propeta tungod lang kay aduna ma'y nagpandong kaniya aron himoon siyang usa ka propeta. Ang propeta gikahimugso kana gikan pa sa tagoangkan sa iyang inahan, ingon nga usa ka propeta, kita n'yo, busa siya'y propeta na sa sugod pa lang. Kita n'yo?

¹⁹⁴ Gisultihan sa Dios si Jeremias kaniadto, miingon, "Sa wala ka pa gisamkon diha sa tagoangkan sa imong inahan," miingon, "naila ko na ikaw ug gibalaan ka na ug gipili ka nang daan ingon nga usa ka propeta sa mga kanasuran." Husto kana. Kita n'yo? Si Moises, sa wala pa siya natawo, usa na man siya ka matahum nga bata. Siya'y propeta na sa Ginoo. Mao usab ang tanang uban pa kanila nga nanungha. Si Cristo mao na ang Anak sa Dios, gikan pa sa tanaman sa Eden. Husto kana. Kita n'yo na, ang mga gasa ug mga pagtawag walay pagkabakwi.

¹⁹⁵ Apan gikahatag ang mga gasa ngadto sa Lawas. Karon naila nato kana, naila nato kining tanan nga mga gasa.

¹⁹⁶ Karon hibaloong nato kung unsa ba si Jesus sa atong taliwala kaniadto, hibaloong 'ta kung unsa gyud Siya kaniadto. Hingsayran nato sa dihang misugod Siya una sa Iyang ministerio...Karon, paminaw mo og ayo, mga bag-ohan. Sa

dihang misugod Siya una sa Iyang ministerio, diha sa San Juan, sa ika-1 nga kapitulo, hingsayran nato human nga gibautismohan Siya, human nga Siya . . . Sa nahimugso Siya ug midangat sa pangidaron nga traynta anyos, gibautismohan Siya ni Juan. Mikunsad ang Balaang Espiritu nga sama sa usa ka salampati ug gikunsaran Siya, ug dunay misulti nga usa ka Tingog ug miingon, “Kini mao ang Akong Anak nga hinigugma nga Kaniya. . .” Ang tinuod og orihinal nga pinulongang Griyego miingon, “Nga Kaniya Ako may kalipay nga mopuyo.” Miingon, “Nga Kaniya Ako may kalipay, nga Kaniya—nga Kaniya Ako may kalipay nga mopuyo.” Apan, nakita n’yo, medyo kinaraan kanang paminawon para kanato, nga ginauna ang berbo sa adberbyo, apan sa tinuod lang ingon-ini kini, “Kaniya Ako may kalipay nga mopuyo.” Tungod, si Cristo, ang Dios diha man kang Cristo, nga nagapasig-uli sa kalibutan ngadto sa Iyang Kaugalingon. Nasayod kita niana.

¹⁹⁷ Bueno, sa gilayon miadto Siya sa kamingawan sulod sa kuwarenta ka adlaw, nga gitintal sa yawa. Dayon migawas didto Siya nga dala ang Iyang ministerio, og misugod sa pagpang-ampo para sa mga may sakit.

¹⁹⁸ Ug wala magdugay, dihay miabot nga usa ka lalaki nga ginganlan og Simon Pedro, usa ka edaran na nga mangingisda, nga dili-edukado, og dili gani makasulat sa kaugalingon niyang ngalan. Pero gisuginlan na siya ni Andres mahitungod niining Lalaki nga gitooan ni Andres nga mao ang Mesias. “Binuang!”

¹⁹⁹ Miduol siya ngadto Kaniya. Ug sa diha nga miduol na siya sa Presensiya ni Jesus, miingon si Jesus, “Ang imong ngalan mao si Simon, ug anak ka ni Jonas.” Nasayod siya nga aduna gyu’y butang nga nahitabo. Nasayod siya nga mao na kadto ang Anak sa Dios. Ug nahimuot si Jesus nga ihatag kaniya ang mga yawi sa Ginghamarian, og gihimo siya nga pangulo sa iglesia.

²⁰⁰ Dihay usa ka lalaki nga atua pud didto, nga ginganlan og Felipe. Nasaksihan kadto ni Felipe, ug sa hunahuna niya, “Kahibulongan! Duna man ko’y kaila nga lalaki nga usa ka makinaadmanon sa Biblia, nga nagapuyo didto mga kinse ka milya gikan sa bukid. Adtoan ko siya ug suginlan. Ang iyang ngalan mao si Natanael.”

²⁰¹ Dalidali siya nga midagan paingon didto niadtong adlaw. Nakadangat siya didto pagkasunod buntag, tingali’g pagbanagbanag na sa adlaw. Midagan siya ug nanuktok sa pultahan. Ug miingon si Mrs. Natanael, “Aba, atua baya siya didto sa prutasan, Felipe.” Ang iyang higala, giadtoan niya didto, ug atua kini nagaluhod, nga nagaampo. Sa diha nga mitindog na kini gikan sa iyang pagluhod, miingon si Felipe, “Umadto ka, tan-awa kung Kinsa ang akong nakita! Si Jesus nga taga-Nazaret, nga anak ni Jose.”

²⁰² Bueno miingon kining relihiyoso, og ilado nga tawo, “May maayo bang butang nga nagagikan gikan sa Nazaret?” Iyang gisultihan siya og maanindot nga kinutlo, maayo nga pamulong, ingon niya, “Ayaw pagpabilin lang sa balay ug sawayon kini, ayaw kini’g hisgot-hisgoti lang. Basta umadto ka, og tan-awa mismo. Umadto ka, og tan-awa! Umadto ka lang, og hibaloa mismo kung duna ba gyu’y maayong butang nga mogula gikan sa Nazaret.”

²⁰³ “Ang buut mo bang ipasabot ang Mesias? Aba, pag moabot ang Mesias, mokanaug man Siya, mokanaug gikan sa... Ipakanaug man ang mga pasilyo sa Langit, og moadto Siya mismo ngadto sa palasyo. Moadto Siya mismo sa atong dakung organisasyon.” Ingon niana gihapon ang ginahunahuna nila sa karon, nakita n’yo, nga moadto kono kini sa ilang organisasyon. “Moadto mismo Siya sa atong organisasyon, og molakaw mismo ilalum dinha sa mga atup sa palasyo. Ug moagi Siya dinha sa gawas nga sawang ug moadto sa trono, ug paingon sa Laging Balaan sa mga balaan, ug moingon, ‘Ako mao ang Mesias.’” Dili man moabot ang Mesias nga ingon niana. Nagaabot ang Mesias sa kon asa Niya gusto. Makagagahum Siya, ginabuhar Niya kung unsa ma’y gusto Niya.

Miingon si Felipe, “Bueno,” ingon siya, “adto lang ug tan-awa! Umadto ka, og tan-awa mismo.”

²⁰⁴ Ayaw pagpabilin lang dinha ug moingon, “Wala man ko nagatoo sa ingon nianang holy-roller nga butang.” Adtoi lagi, og hibaloa mismo kung aduna ba’y unsa mang butang mahitungod Niini.

²⁰⁵ Busa si Felipe, sa anaa pa sila sa dalan, madungog ko sila nga nag-istoryahanay. Atong hibaloon, gusto n’yo bang madungog kung unsay ilang ginaistoryahan? Atong paminawon ug hibaloon kung unsay ilang gipangsulti. Sa tan-aw ko, samtang nagalakaw sila sa daplin sa dalan, kabalo mo, miingon si Felipe, “Abi nimo, Natanael, nasayod ko nga usa ikaw ka magtutuan sa Biblia, busa aduna ko’y gustong ipangutana kanimo. Nagapaabot kita sa usa ka Mesias, dili ba?”

²⁰⁶ “Oh, oo, midangat na gani kita sa kaulahiang mga adlaw sa niini nga henerasyon ug, nagatoo man ko nga makita gyud niini nga henerasyon ang maong Mesias.” Karon paminaw. “Oh, apan ania kita, dili pa gani kita usa ka nasud, nangapatlaag pa kitang tanan sa taliwala sa mga katawohan. Unsaon man nato pagkabaton niini? Luyo niining tanan!” Pero nagaabot baya ang Dios sa takna nga wala ninyo damha. Sa ingon nianang taknaa Siya nagaabot.

²⁰⁷ Miingon si Natanael, “Apan, kadali lang, unsa man nga matang sa tawo kining mamahimong Mesias?”

“Oh, si Moises, nga atong magtutudlo, nagsulti man kanato nga mamahimo Siyang usa ka propeta.”

208 “Sultihan ta ka mahitungod niining Jesus nga taga-Nazaret. Nahinumdum ka ba niadtong edaran nang walay-hibangkaagan nga mangingisda nga imong gipalitan og isda kaniadto nga panahon, nagdala, nagpalit ka gikan kaniya, ug dili gani siya makahimo bisan sa pagpirma sa resibo, og walay igong edukasyon?”

209 “Oo! Oh, oh, oo, uh-huh. Si Jonas lagi ug kadtong anak ni Jonas. Oo, nakapalit man ko kang Jonas, usab.”

210 “Bueno, karon, kabalo ba ka kung unsa? Miadto si Pedro didto...” O si Simon, diay, Simon pa man ang ngalan niini kaniadto. Miingon si Felipe, “Mitambong si Simon sa panagtigum ni Jesus. Ug sa diha nga miduol na siya, iyang... Mahinumduman mo ba kung unsa nga gisultihan kita ni Simon kaniadto nga giingnan siya sa iyang amahan nga ‘Dili gyud ta kono magpalimbong, tungod kay managpanungha ang daghang mini nga mga propeta sa dili pa magaabot ang tinuod nga Mesias.’ Ug tinuod gyud kana. ‘Managpanungha ang daghang mini nga mga mensahe.’ Apan miingon, ‘Mahibaloan mo man pagmoabot na ang tinuod nga Mensahe, tungod kay, hinumdumi, kita nga mga Judio nagatoo gayud nga kini nga Mesias mamahimong usa ka propeta.’ Nagatoo man kita sa atong mga propeta.”

211 Pangutan-a n’yo ang usa ka Judio karon. Ang Israel, pag kuhaon nila ang Biblia dinha mismo karon, sila nga gikan pa sa Iran ug ubang mga dapit, basahon nila Kini. Moingon sila, “Kung kanang Jesus mao gyud ang Mesias, ipakita kanamo Siya nga ginabuhat ang ilhanan sa propeta, toohan namo Siya.” Oo, sir. Nasayod man sila nga ang mga propeta matitud-anon gayud.

212 Busa tingali’g miingon si Natanael, “Oh, nagatoo man ako nga ang Mesias mamahimong usa ka propeta, tungod miingon man si Moises, ‘Ang Ginoo nga atong Dios magpatindog og usa ka propeta.’”

213 “Bueno, sa diha nga iyang nasaksihan kadto, niining Simon nga imong ginahisgotan, miingon si Jesus, ‘Ang imong ngalan mao si Simon, ug anak ka ni Jonas.’ Dili lang nga nailhan Niya siya, kondili nailhan Niya usab ang diosnong tigulang Fariseo nga amahan niini.”

“Ah! Dili ako makatoo niana. Misobra na man ka.”

214 Miingon si Felipe, “Oh, wala, wala ako nasobra! Adto lang lagi, og hibaloa mismo. Ari ka na og, tan-awa! Dali!” Didto sa dala padayon ra sila nga, nanglakaw.

215 Sa katapusan sa dihang nakaduol na si Natanael sa Atubangan kon diin atua si Jesus, tingali’g atua sa taliwala sa mga mananambong sa kon asa man. Nagatindog si Jesus didto, nga nagatan-aw sa palibot. Wala magdugay sa Iyang pagtan-aw tan-aw didto, ug Iyang nakita si Natanael nga nagatindog didto,

ingon Niya, “Tan-awa ang usa ka Israelinhon, nga kaniya walay limbong!” Mao kadto ang nagpatangtang sa pagka-pormal ni Natanael. Mao kadto ang hangin nga nagpalawig sa layag. “Tan-awa ang usa ka Israelinhon, nga kaniya walay limbong!”

²¹⁶ “Dios kana,” ingon siya. Ang “Rabbi,” nga nagakahulogan og *magtutudlo*, “Rabbi, kanus-a Mo man ako hiilhi? Wala ko pa man Ikaw nahinagbo kaniadto, usa pa man ako ka bag-ohan sa niini nga kongregasyon, wala pa gyud ko sukad nakatambong dinhi kaniadto. Giunsa Mo man pagkaila kanako?”

²¹⁷ Miingon si Jesus, “Sa wala ka pa gitawag ni Felipe, sa didto ka pa ilalum sa kahoy, nakita Ko na ikaw.”

²¹⁸ Mao kadto si Jesus kagahapon. Husto ba kana? Kung Siya mao sa gihapon kaniadto, nan Siya mao gihapon sa karon. Hisgotan nato ang usa pa ka nasud sa katawohan. Dihay usa ka nasud sa katawohan kaniadto . . .

²¹⁹ Aduna lang ma’y tulo ka nasud sa katawohan kaniadto, ug mao kanang sa kang Ham, Sem ug sa katawohan ni Japhet. Kita n’yo? Eksakto gyud kana. Dinha sa, Pentecostes, kon diin mipaingon ang Ebanghelyo ngadto sa mga Judio, dayon ngadto sa mga Samarianhon, ug pagkahuman paingon ngadto sa mga Gentil. Kita n’yo, ang kang Ham, Sem, ug katawohan ni Japhet, mao—mao kana ang tulo ka nasud. Bueno, duha ka nasud kanila ang nagapaabot kaniadto sa usa ka Mesias; dili kita nga mga Gentil. Ngani aduna pa kita niadto og bunal sa atong likod, mga pagano pa man gud kita kaniadto, nga nanagsimba sa mga dios-dios; apan dili—dili ang sa kang Ham ug Sem.

²²⁰ Bueno, aduna pa’y usa ha, ang—ang usa pa ka nasud mao ang sa mga Samarianhon, nga katunga Judio ug katunga Gentil, nga mao’y resulta sa kasal-anan sa kaminyoon ni Korah kaniadto, ug nahitipas sila. Pero nagatoo sila sa Dios, nagapaabot sila sa usa ka Mesias. Busa miadto si Jesus, nga ginarepresentar ang Iyang Kaugalingon sa atubangan nila. Miadto man Siya sa mga Judio, sa mga Iya, apan gikinahanglan pa man Niya nga moagi sa Samaria. Ang San Juan 4, nabasa na ba ninyo kana? Ug gikinahanglan Niya kaniadto nga moagi sa Samaria. Busa miadto ’usa Siya sa lungsod sa Sicar, ug Iyang gipalakaw ang Iyang mga tinun-an aron mopalit og pagkaon. Ug samtang nanglakaw sila . . .

²²¹ Kung nakaadto na mo didto, usa kadto ka talan-awon, may usa ka atabay, usa ka sag-ubanan sa lungsod, mora’g ingon-ana, kon diin sila nagakalos og tubig. Kabalo mo, nagaadto didto ang mga kababayan-an ug nagagamit og pangkalos ug ginapaubos ang timba, aron magkalos og tubig, og ginalukdo nila kadto. Ug kaniadto ang mahugaw’g-dungog nga mga kababayan-an, ang dautan nga mga kababayan-an, dili sila puedeng makigdungan sa maayong dungog nga mga kababayan-an. Wala man sila’y pagpakigkauban niadtong mga panahona. Ang usa ka babaye

nga dautan, magpabilin ra pud siya sa iya mismong mga kaubanan. Pero dili na ingon niana sa karon; magkauban na man silang tanan, basta na lang silang. . . ug sila, sama ra pag ginabatil mo ang pula sa itlog, mamahimo nang pula ang tanan, kita n'yo. Busa kaniadto, ilang, ginapuno gyud kining. . .

²²² Migawas didto ang mahugaw'g-dungog nga babaye, mga alas onse-traynta o kinse minutos para mag-alas dose, mga ingon niining orasa sa adlaw, miadto didto ang maong babaye aron magkalos og usa ka timba sa tubig. Ug iyang gipaubos ang. . . gitaud ang. . . mahanduraw ko siya nga ginataud ang karaang mga kaw-it ug ang pangkalos, ginapaubos kini ngadto sa atabay, aron magkalos og usa ka timba sa tubig. Ug niadtong tungora mismo nga hinay-hinay na niyang ginapataas ang pangkalos, may nadungog siya nga miingon, "Babaye, hatagi Ako og mainom." Ug mitan-aw siya ug atua ang usa ka Judio. Bueno, wala man sila'y mga pagpakigharong sa usa'g usa kaniadto.

²²³ Atua ang usa ka hamtong na nga Tawo, Siya'y mga traytahon pa. Apan miingon ang Biblia nga mora na Siya og singkwenta anyos, kabalo na mo niana. Ingon niya, "Moingon Ka nga nakita Mo na si Abraham, ug usa man Ka ka tawo nga wala pa milagpas sa singkwenta anyos ang pangidarong." Pero Siya'y traynta anyos pa lang. Kita n'yo? Miingon. . . sa hunahuna ko basin ang Iyang ministerio mao ang medyo nakapatigulang Kaniya. Busa ingon niya, "Moingon ka nga nakita Mo na si Abraham, kung ingon-ana nasayod kami nga adunay yawa Kanimo."

²²⁴ Miingon Siya, "Sa wala pa si Abraham, MAO NA AKO." Kita n'yo, Siya mao ang Dios ni Abraham. Oo, Siya mao gayud. Miingon Siya, "Sa wala pa si Abraham, MAO NA AKO." Oo.

²²⁵ Ug kaniadto, atua Siya nagalingkod sa may atabay, ingon Siya, "Babaye, hatagi Ako og mainom."

²²⁶ Ingon ang babaye, "Dili baya kini nabatasan. Aduna man kita'y panaglainlain dinhi." Sama kanila sa Habagatan kaniadto, sa mga itum ug mga puti, kita n'yo. Miingon ang babaye, "Aduna man kita'y panaglainlain dinhi. Dili baya nabatasan para Kanimo nga mohangyo kanako, Ikaw (nga usa ka Judio) mohangyo kanako (ingon nga usa ko ka babaye nga taga-Samaria) nga mohatag og unsa mang pabor, o unsa mang butang. Wala man kita'y pagpakigharong sa usa'g usa." Usa ka luoy'ng bigaon ang maong babaye, kabalo na man mo. Ug, tingali usa siya ka maanyag nga babaye. Ug atua siya didto, siguro nakadunghay pa sa iyang tibuok nawong ang gipakulot niya nga buhok, kabalo na mo, ug tibuok gabii nga atua sa gawas. Ug—ug busa miingon siya, ug ingon siya, "Dili baya nabatasan para Kanimo nga mohangyo kanako, og ingon-ana, ingon nga usa ko ka babaye nga taga-Samaria."

²²⁷ Ingon Niya, "Babaye, kung nasayod ka lang kung Kinsa ang nakig-estorya kanimo, ug kon nasayod ka lang kung Kinsa ang

imong gikaestorya, mangayo ka gayud Kanako og mainom.” Mao kana ang Mesias kaniadto, kita n’yo. “Kon mangayo ka Kanako og mainom, hatagan Ko ikaw og tubig nga dili ka na moanhi pa dinhi aron magkalos.”

228 “Aba,” miingon ang babaye, “halawum ang atabay, ug wala Ka gani og unsa man nga ipangkalos dinha, busa unsaon Mo man paghatag kanako og tubig?” Miingon, “Ang among ginikanan nga si Jacob!” Kita n’yo, usa siya ka Samarianhon, apan iyang gitawag si Jacob nga iyang ginikanan, usab. “Ang among ginikanan, nga si Jacob nag-inom man gikan niini nga atabay, ang iyang mga hayop, og ang iyang pamilya. Ug bisan pa niana moingon Ka nga aduna Ka’y tubig nga labaw pa niini?” Ingon pa, “Moingon Ka ‘magasimba,’ Ikaw nga usa ka Judio, nagaingon Ka nga ‘sa Jerusalem.’ Pero moingon kami nga sa niining bukira.”

229 Ingon Niya, “Babaye, moabot ang panahon, ug karon miabot na, sa dihang ang tinuod nga mga magsisimba magasimba sa Dios diha sa Espiritu, kay ang Dios Espiritu man.” Kita n’yo? “Ingon niana nga pagsimba ang ginapangita sa Amahan.”

Unsa ma’y Iyang ginabuhar? Nakig-estorya ‘usa Siya sa babaye, aron sa pagkontak sa espiritu niini. Kita n’yo? Karon, timan-i, nga kinahanglan Niya kaniadto nga mamahimong Mesias, sa atubangan niadtong mga Samarianhon. Ug sa gilayon nahibaloan Niya ang problema sa maong babaye. Pila man ang nakahibalo kung unsa kadto? Tinuod. Nakigpuyo na kini sa ikaunom nga bana niini.

Busa, nakita n’yo na, sayup gayud kon aduna ka’y usa ka bana nga buhi pa, dinha, ug—ug ingon niana, ug makigkuyog-kuyog ka sa ubang lalaki. Ug bisan sa unsa na lang nga hinungdan, pag biyaan mo ang usa ka babaye, ug makigminyo sa ubang babaye, ug magminyo na usab og lain, magminyo og lain, og magminyo na pud og lain, ayaw gyud ninyo buhata kana. Busa miingon Siya, iyang . . .

Dayon ang maong babaye, siguro nakigpuyo-puyo ra kini nga wala man lang naikasal kanila. Tingali’g wala pa gayud kini naikasal kanila. Tingali’g wala pa gani kini naikasal sukad-sukad. Busa gitug-an na sa maong babaye ang tanan niadtong dautan nga mga butang, kabalo mo, ang tanan-tanang nabuhar niya nga dautang mga butang.

Bueno niadtong tungora samtang atua si Jesus didto, nga nagatan-aw sa maong babaye nga nakaingon *niini*, miingon Siya, “Lakaw, ug hatagi Ako og mainom.” Ug ingon niya . . . “Apan kung nasayod ka lang kung Kinsa ang imong gikaestorya, mangayo ka gayud Kanako og mainom. Hatagan Ko ikaw og tubig nga dili ka na moanhi pa . . . hatagan Ko ikaw og tubig, nga dili ka na moanhi pa dinhi para moinom.” Dayon miingon Siya, “Lakaw, ug kuhaa ang imong bana ug balik dinhi.”

Ingon ang babaye, “Sir, wala man ko’y bana.”

“Oh,” ingon Siya, “tinuod ang imong giingon. Tungod nagkaaduna na man ka og lima ka bana, ug ang usa nga aduna ka karon dili man imong bana. Tinuod kining imong giingon.” Ang babaye, paminaw mo, ang maong babaye... Bueno sa diha nga...

Unsa ma’y gibansag Kaniya sa mga Judio kaniadtong nasaksihan nila Siya nga gibuhat ang ingon-ana? Naila ba nila Siya ingon nga mao ang Mesias? Wala. Unsa ma’y ingon nila kung kinsa Siya? “Beelzebub, usa ka manghihimalad,” miingon, “gahum kana sa Beelzebub.” Ug gitawag nila ang Espiritu sa Dios, nga namuhat niadto nga pagpang-ila, “ingon nga usa ka mahugaw’ng butang.”

Miingon Siya, “Kon mosulti kamo og usa ka pulong batok Kanako, pasayloon Ko pa kamo. Apan sa umalabot ang Espiritu Santo moabot, aron magbuhat sa mao gihapong butang; ug kon mosulti kamo og usa ka pulong batok Niini, dili na gayud kamo mapasaylo.”

²³⁰ Bueno makita ba ninyo kon asa na kita sa karon, kung nahitabo man kini sa karong panahon. “Usa ra ka pulong batok Niini, dili na gayud pagapasayloon, bisan niining panahona o sa umalabot pa nga panahon.” Busa nakita n’yo na kung unsay gibuhat niadto nga kaliwatan. Karon hunahunaa n’yo kini. Hunahunaa n’yo og ayo. Palandunga n’yo kining halangdon nga mga Pulong.

²³¹ Bueno, miingon ang mga Judio, “Kining Tawo nga nagabuhat niining mga butanga Beelzebub. Usa Siya ka yawa, manghihimalad.” Nasayod man kita nga ang pagpanghimalad iya sa yawa. Busa miingon ang maong lalaki, “Kini nga Tawo usa ka manghihimalad.”

²³² Hinoon gipasaylo man Niya sila sa pagbansag Kaniya ingon nga usa ka manghihimalad. Apan human nga namatay Siya ug mibalik na ang Balaang Espiritu, nan nalahi na pagkahuman niadto. Kita n’yo? Ug mao nga, para na kadto sa henerasyon sa mga Gentil. Karon matikdi.

Bueno, nasaksihan na kadto sa—sa mga Judio, og gipanghimaraut ra nila kadto.

²³³ Pero gidawat kadto sa mga Samarianhon, ug miingon ang maong babaye, “Sir, naila ko nga Ikaw usa ka Propeta.” Unsa ma’y pagabuhaton mo niini, Samarianhon? “Naila ko nga Ikaw usa ka Propeta. Nasayod kami nga pagmoabot na ang Mesias, isulti Niya kanamo ang ingon niining mga butang.” Kita n’yo, naila gyud nila ang Mesias, kung Kinsa Siya. Miingon, “Nasayod kami nga ang maong Mesias, nga gitawag og Cristo, pagmoabot na Siya isulti Niya kanamo ang ingon niining mga butang. Apan Kinsa Ka ba? Ikaw na ba kaha ang Iyang Propeta?”

Miingon Siya, “Ako mao Siya. Ako mao Siya.”

²³⁴ Ug tungod niini! Karon paminaw. Tungod niini, gibiyaa sa babaye ang iyang banga ug midalagan paingon sa siyudad, ug miadto aron sultihan ang mga tawo sa kadalanan, midalagan sa tibuok siyudad, miingon, “Umari kamo, tan-awa ninyo ang usa ka Tawo Nga nagsulti kanako sa mga butang nga nabuhat ko! Dili ba mao na kini ang mismong Mesias?” Ug miingon ang Biblia nga mitoo Kaniya ang tibuok siyudad tungod kay kining maong babaye nagsulti man niining, Iyang gisulti kanila, nga Siya mao gayud ang Mesias.

²³⁵ Bueno, kung mao kadto ang ilhanan sa Mesias kaniadto, ug Siya man mao sa gihapon kagahapon, karon, ug hangtud sa kahangturan, nan mao gihapon kini nga ilhanan sa karon. Husto ba kana? Pila ba ang mouyon niana? Sigurado, oo, mao ra gihapon kini. Oo.

²³⁶ Karon, mamahimo ba kining lahi nga tawo? Dili. Nahigugma Siya, mituaw Siya, mihilak Siya, nahikatulog Siya, miadto Siya sa kamingawan, nangisda, og gibuhat ang mismong mga gibuhat ni kinsa man. Tawo lamang Siya, kita n’yo, apan bisan pa niana Siya mao ang dinihogan nga Mesias.

²³⁷ Bueno, karon kon atong hinumduman dinha sa Biblia, nga nagsulti kanato kaniadto, kon diin nangita kita sa daghang mga Kasulatan ug napamatud-an nga nagapamahayag ang Biblia nga adunay moabot “Nga adlaw nga dili mahimong gabii ni adlaw man,” usa lamang ka makilumkilumon nga adlaw, ang mga organisasyon ug iglesia, ug igo lang nga mamaluwas, “apan sa panahon sa kagabhion motungha ang Kahayag.” Pila ba ang nakabasa na niana diha sa Biblia? Sigurado. Kita n’yo?

²³⁸ Karon, sa laing pagkasulti, nagasubang ang adlaw sa Sidlakan ug nagasalop sa Kasadpan. Ang mao ra nga adlaw nga nagasubang sa Sidlakan, nagasalop usab sa Kasadpan. Bueno, sa dihang ang Anak sa Dios, S-o-n [A-n-a-k—Tigh.], misubang sa Sidlakan, ngadto sa taga-Sidlakan nga mga tawo. Mibiyahе usab ang sibilisasyon, mibiyahе uban sa adlaw, ug ania na kita sa West Coast karon. Kung motabok ka, paingon ka na sa China, nan mahibalik ka sa Sidlakan pag-usab. Busa kung ingon-ana ang mao ra nga Son [Anak—Tigh.] nga misidlak kaniadto sa Sidlakan nagasidlak usab karon sa Kasadpan, nga dala ang mao ra nga bautismo sa Espiritu Santo, mao ra nga mga ilhanan, mao ra nga mga katingalahan, og mao ra nga Mesias. Husto ba kana? “Sa panahon sa kagabhion motungha ang Kahayag, ang dalan ngadto sa Himaya imo gayud mahikaplagan.” Husto kana.

²³⁹ Ania na kita sa pang-gabii, sa pang-gabii nga Kahayag. Pasalop na ang adlaw. Ania ang Mesias sa atong taliwala. Ang Anak sa Dios, diha sa porma nga Balaang Espiritu, ania sa atong taliwala karon. Nagatoo ba mo niana? [Nagaingon ang kongregasyon, “Amen.”—Ed.] Nagatoo ba mo kanako nga

Iyang alagad? [“Amen.”] Nagatoo ba mo nga ang ginasulti ko kaninyo mao gayud ang Kamatuoran? [“Amen.”] Nagatoo ba mo sa maong estorya mahitungod sa Manulonda kagahapon sa buntag, niadtong buntag sa miaging adlaw? [“Amen.”] Nagatoo ba mo niini? [“Amen.”] Kung ingon niana man tugoti ang Dios sa Langit, tugoti ang Dios nga nagpakita kanako diha sa porma nga balangaw, tugoti Siya nga manulti. Ug ginapahinungod ko ang akong lawas, ang akong kalag, espiritu, ug hunahuna, ginapahinungod ko gayud alang sa Iyang kahimayaan. Sa dihang nagpaabot ako alang niadtong kaulahiing squirrel, ug ingon nga nasayod na ko nga mao na kadto ang pinakaulahi, mitungha kadto mismo tres minutos adisir nag-alas diyes, ug sumala sa ako nang gikaingon nga motungha gyud kadto pag mag-alas diyes.

Kabalo mo, miingon Siya, “Isulti ang bisan unsa nga buut mo. Mamahimong ingon niana kini.” Wala pa gayud Siya sukad napakyas, bisan pa man. “Isulti lang ang bisan unsa nga buut mo.”

Apan ang ikawalong higayon nga nahitabo, nahitabo kini sa usa ka luoy’ng babaye. Nagalingkod siya karon dinha sa luyo, sa hunahuna ko. Nakita ko si Igsoong lalaking Wright nga nagalingkod dinhi. Si Hattie Wright, kaniadtong naghangyo siya para sa iyang duha ka an- . . . Anaa siya, dinha mismo karon. Mahitungod kadto sa kaluwasan para sa iyang duha ka anak, (dili ba?), nga hugot gayud ang pagsupak niini. Miingon ko, “Ginahatag ko kanimo ang imong mga anak, sa Ngalan ni Jesus Cristo.” Nalup-og sila mismo sa iyang sabakan.

²⁴⁰ Si Ed Daulton usab, usa ka Baptist nga ania karon, nga taga Kentucky, nagalingkod siya mismo dinhi. Pila gani ang imong mga anak, Ed? Dose ka anak. Ania man siya mismo, nangamuyo pud siya kaniadto para sa iyang mga anak. Migawas ako sa bilding. Miduol kanako pag-usab si Ed; ingon ko, “Ed.”

Ang Balaang Espiritu nga anaa kanako, miingon, “Thatag kini kaniya. Ihatag na kaniya.”

²⁴¹ Miingon ko, “Ginahatag ko kanimo ang imong mga anak.” Ngani ang matag usa kanila, naluwas gayud ug nangabautismohan. Atua kaniadto sa ilang balay ang iyang olitawo, nga nagahulat, nagahilak, og naluwas kini sukad niadtong mitambong siya dinhi. Kining igsoong Baptist nga taga . . . Oh, oh, makahibulongan gayud Siya sa dihang magapanulti Siya!

²⁴² Hangyoon ko Siya karon, alang sa Iyang kahimayaan, nga ipakita ang Iyang Kaugalingon, nga Siya mao si Cristo, og nga nagasulti ako sa Kamatuoran.

²⁴³ Karon, aron nga dili makaikyas ang—ang dili-magtotoo. Buut kong ang mga tawo nga ania dinhi, nga nagmasakiton ug nagkinahanglan, mga nanginahanglan sa Dios, nga wala nako

hiilhi, mga estranyo sa atong mga pultahan, mga tawo nga wala nako hiilhi, nga ania dinhi, ug nanginahanglan kamo sa Dios, ipataas ang inyong mga kamot. Ang mga tawo sa kon asa man. Kana, oo, halos ang kadaghanan man diay, sa tan-aw ko. Mga tawo nga wala nako hiilhi. Kung aduna man ko'y tawgon nga nakaila, nga akong nailhan ug nakaila pud mo kanako, ug—ug magkaila kita sa usa'g usa, ayaw kamo pagsulti og bisan unsa man, maghilum lang gayud. Kung Siya mao ang Anak sa Dios, ingon nga Siya gayud, ug husto ang akong Mensahe, ug kadtong Manulonda . . .

244 Sa dihang tres minutos na lang para mag-alas diyas, ingon na ko, “Oh Dios, Nga nagpakita kanako diha nianang balangaw kaganina, tres minutos na lang. Wala pa ako'y nakita nga squirrel. Tres minutos na lang, mao nga siguradong maghatag gyud Ka og usa para kanako.” Ug ang Dios ingon nga akong Maghuhukom, maalampoon kong ginasulti kini samtang nakapatong ang akong kamot sa Biblia. Wala ko nagatoo sa pagpanumpa, ang Biblia wala man nagaingon niana; hinoon nagaingon Kini nga dili magbuhat og ingon-niana. Apan ang Dios mao'y akong Maghuhukom, duna gyu'y usa ka squirrel nga midagan gikan mismo sa kahoy ug napahimutang nga ingon gayud ka tukma. Wala gyud Niya kadto gipakyas; wala gayud Niya pakyasa. Daghan man kanila ang ania dinhi nga nasayod niana nga mga butang. Nasayod ko nga Siya, ang mao ra nga Dios, ania gyud dinhi.

245 Ngani aduna na'y mga prayer kard nga napanghatag. Ayaw ko man unta og ingon niana. Igaampo man nato sila pagkataudtaud, og maapil pud sila unya sa linya. Ayaw ko unta ang mga tawo nga—nga taga-dinhi mismo, o unsa man.

246 Gusto ko og mga bag-ohan. Gusto ko og mga tawo nga wala nakaila kanako. Gusto ko man gud nga maghunahuna kamo, gusto ko nga inyong hunahunaon ug mag-ampo mo, ug moingon, “Dios, kanang tawhana wala man nakaila kanako.”

247 Ug usa niadto ka adlaw may usa ka luoy'ng babaye nga midutdot sa taliwala sa kadaghanan. Aduna kini'y talinugo. Ug miingon kini . . .

248 Sa dihang ang tanan kanila kaniadto nanag-ingon, “Ania na Siya! Tan-awa n'yo Siya! Siya kanang taga-Galilea,” o ingon niana. Ang tanang mga magtutudlo ug uban pa nga atua didto, nanag-ingon, “Rabbi, nagapangita kami og usa ka ilhanan gikan Kanimo,” ug uban pa nga sama niana.

249 Pero miingon ra kining luoy'ng babaye, “Nagatoo ako Kaniya nga mao ang Anak sa Dios. Ug nagatoo ako nga kung mahikap ko lang unta ang borlas sa Iyang bisti, mamaayo gayud ako.” Pila man ang nasayod niana? Gihikap Siya sa maong babaye.

250 Dili tungod nga makabati Siya; kondili mihunong Siya ug milingi, nga miingon, “Kinsa ba’y mihikap Kanako? Adunay mihikap Kanako.” Mao nga nanghilum gyud ang tanan niadto. Miingon, “Adunay mihikap Kanako.” Miingon, “Kinsa ba’y mihikap Kanako?”

251 Ug mitan-aw Siya sa palibot hangtud nga nakita Niya ang luoy’ng babaye. Dili na maitago sa babaye ang iyang kaugalingon. Dili ra man unta siya makita. Pero nakit-an gyud siya ug giingnan, “Ang imong pagtoo mao’y nagluwas kanimo.” Giingnan, gisultihan ang babaye, nga ang iyang talinugo nasalbar tun- . . . miundang na sa pag-agas, tungod kay mitoo man siya, ug ang pagtoo niya mao’y naghikap sa bisti ni Jesus. Nagatoo ba mo niana? Sige.

252 Bueno, usa ba si Jesus ka Labaw’ng Sacerdote sa karon nga nagalingkod sa toong kamot sa Dios, nga nagapangaliya sa atong mga pagsugid? Nagaingon ba ang Biblia nga Siya mao ang Labaw’ng Sacerdote nga arang matandog sa pagbati sa atong mga kaluyahon? Husto ba kana? Okey, kung aduna man kamo’y sakit, sugod na kamong mag-ampo, og moingon, “Ginoong Dios, bag-ohay ko lang napatalinghugan ang usa ka Mensahe. Ako—wala ako makaila niining tawhana. Ako’y—mianhi lang ako sa tabernakulo. Dili gyud ko ingon nga nagatambong dinhi, dili man kini ang akong kaugalingong simbahan. Gikan ako sa ubang lugar. Dili ko taga-dinhi niining lungsod, gikan pa ko sa ubang lugar. Wala ako makaila sa maong tawo. Apan ginahimo niyang, ingon gayud ka sigurado nga Ikaw kini, ug miingon nga nagpakita Ka kaniya, nga ang iyang Mensahe husto gayud, ug kon giunsa Mo pagpamuhat niining mga butang. Karon, wala ko makaila sa maong tawo, apan nakaila ako Kanimo. Busa kung gipahinungod man niya ang iyang kaugalingon nganha Kanimo, ug ginagamit Mo ang iyang lawas aron ipanulti ang Imo Mismong mga Pulong, nan itugot nga manulti siya para kanako. Tugoti kong mahikap ang Imong bisti, Ginoo.” Ug hibaloa n’yo kung mamuhat ba gyud Siya o dili! Hibaloa n’yo mismo kung Siya’y Dios gayud.

253 Kung Siya’y Dios sa gihapon, nan mahimo Niyang gamiton ang akong mga ngabil aron isulti ang mao ra nga mga pulong nga Iyang ginasulti, tungod kay wala man Siya’y mga ngabil kondili pinaagi ra kanako ug kaninyo. Wala Siya’y mga mata kondili pinaagi ra kanato. Busa mokunsad lang Siya ug mamuhat sa Iyang Iglesia pinaagi sa atong lawas. Nagatoo ba mo niana? Nagapamuhat, Siya Mismo! Mao kana’y Iyang giingon. “Ang mga buhat nga Akong ginabuhat, mao ra usab ang inyong pagabuhaton.” Husto ba kana? “Mao ra nga mga buhat, ang inyong pagabuhaton.” Mao kini nga mga buhat ang Iyang gipamuhat kaniadto, aron sa pagpamatuod nga Siya mao ang Mesias. Karon, kung Siya mao ang Mesias, ug Siya man usab, kaniadto, nan kung tinuod kana, nan nagapamuhat Siya karon

mismo sa mao gihapong mga buhat, nga Iyang gibuhat kaniadto, pinaagi sa Iyang Iglesia. Nagapamatuod gyud nga husto kini, bisan unsa pa ang tanan ninyong mga denominasyon. Oh, alleluyah!

²⁵⁴ Ania karon ang tigulang na nga si Igsoong lalaking Kidd ug Igsoong babayeng Kidd, silang duha, ug sila’y otsenta anyos na, nagawali na siya sa wala pa ako matawo. Nagahigda siya niadtong miaging buntag, nga naghimalatyon na, tungod sa kanser, ngani mga duha na ka tuig ang milabay, gioperahan na man ang iyang prostate; didto sa Ohio. Sila’y suod ko gayud nga mga higala. Gitawgan ko ni Igsoong babayeng Kidd, miingon, “Billy, mas maayo nga magdali ka. Naghimalatyon na siya, himalatyon na gyud siya.” Ug halos mapudpod na gud namo ni Billy ang akong segunda mano nga sakyanan, sa pagpaingon namo didto.

²⁵⁵ Sa pagsulod ko didto sa maong lawak, sa pag-abot ko mismo didto, nanulti ang Balaang Espiritu, “MAO KINI ANG GINAINGON SA GINOO.”

²⁵⁶ Anaa na siya dinha karon, ingon nga usa ka sa pamatuod alang sa himaya sa Dios, naguol na gani kaayo ang iyang doktor kaniadto. Ingon niini lang, Siya’y Dios gayud! Mahimo ko ba kadto? Dili, sir! Ang akong mga pulong pareho ra man sa ubang tawo. Apan kadto mao gayud ang MAO KINI ANG GINAINGON SA GINOO! Amen.

²⁵⁷ Pila na ka tuig ang milabay, didto sa kabukiran sa Kentucky, didto sa usa ka karaang Iglesia sa Dios, o ang pipila kanila didto, may ginadala sa ilang pagtungas ug pagnaug didto sa kabakiliran, nagadukdok og mais gamit ang sa usa ka galamiton, kauban ang tigulang nga inahang Kidd, para mapakaon ang ilang mga anak; naga-labandera pa gyud siya, para makaadto ang iyang bana sa natad sa pagpangmisyon.

²⁵⁸ Ug ania sila karon nga mga otsenta anyos na, nagalingkod dinhi karon, nga nagakalipay tungod sa Ebanghelyo ni Jesus Cristo, nagabiyahe pa gyud sila og usa ka gatus kapin ka milya kada Dominggo sa buntag, sa matag Dominggo pag nagawali ako dinhi, pag makabalita sila bahin niini. Oo, ginapadalhan sab namo sila og imbitasyon, kon gusto man nila nga motabong. Panalanginan gayud ang ilang edaran na nga mga kasingkasing. Husto kana. Buut kong ang matag tawo nga ania dinhi nga makiglamano kanila niining buntaga, kung mahimo, og panalanginan sila.

Karon mag-ampo ta.

²⁵⁹ Oh, nalipay gayud ako nga masayran nga Siya’y Dios. Pagkaanindot nga pagbati! Moingon mo, “Para sa unsa man nga naglangay-langay ka, Igsoong Branham?” Nagapaabot ako Kaniya. Usa kini ka . . . nagwali na ako. Kini’y usa na usab ka pagdihog.

²⁶⁰ Ug kung moabot Siya ug buhaton kini, kung ingon niana pila man ang ania dinhi, nga nagmasakiton, ang modawat Kaniya ingon nga ilang Mananambal? Ipataas lang ang inyong mga kamot, ang tanang mga masakiton, kung Iyang—kung Iya kining buhaton. Ipataas ang inyong mga kamot, ang tanan nga nagmasakiton, nga nakasaksi sa maong Mesias, si Cristo, nga ania sa taliwala sa mga tawo, og nagapanulti.

²⁶¹ Pag-ampo mo. Magtoo gayud. Ipahinungod ko úsa kini nga bahin sa bilding. Daghan na ang nagaampo. Makita ko na ang pagdihog.

²⁶² Ania. Pila man kaninyo ang nakadungog na nianang, Haligi nga Kalayo dinha, nga gisab-it sa siyensiya ang retrato Niini didto sa Washington, DC? Kabalo na man mo niana. Ania ang retrato Niini, dinhi mismo, ang mao ra nga Haliging Kalayo nga nanguna kang Moises kaniadto. Gani miingon mismo ang siyensiya, “Sa umaabot nga adlaw maanaa na kini sa mga estante sa mga baligyaanan. Ang bugtong supernatural nga Persona nga nakuhaan og retrato sukad-sukad.”

²⁶³ Kanang mao gihapon nga Manulonda ania mismo sa pulpito karon. Susiha n’yo kini. Ginahagit ko kamo nga toohan kini. Kamong mga bag-ohan, managpanoo kamo.

²⁶⁴ Karon kinahanglan kong tan-awon kung asa Kini nagapaingon. Magmatinahuron gayud, ang tanan, diha sa Iyang Presensiya, sa niana nga Kahibulongan.

²⁶⁵ Nakita ko ang usa ka lalaki. Ania na. Ania ang maong lalaki sa akong wala, dinhi mismo sa may suok. Nagaantus siya tungod sa sakit nga sinus ug sakit sa tiyan. Magtoo ka sa bug-os mong kasingkasing. Usa siya ka estranyo kanako. Kini mao si Mr. Wells. Mao kana ang imong apelyido, Mr. Wells. Dili ka taga dinhi. Gikan ka pa sa usa ka lugar nga gitawag og Aurora, Illinois. Tinuod kana. Tinuod ba? Usa pud ako ka estranyo kanimo. Kung husto kana, ipataas ang imong mga kamot. Tumindog ka. Giayo ka na ni Jesus Cristo.

Nagatoo ka ba karon? “Kung mahimo mong toohan.”

²⁶⁶ Karon, anaa dinha, kanang usa ka lalaki, nga wala ko pa nakita sa tibuok kong kinabuhi, ug estranyo gayud sa atong taliwala. Siya’y taga laing estado. Ug ang Balaang Espiritu, karon, kung unsa ma’y isulti Niini para kaniya, dili ako makahibalo hangtud nga mapaminawan ko na kanang teyp. Ang pagdihog kini nga nagaabot kanimo. Apan nasayod ang maong lalaki.

²⁶⁷ Tinuod ang gikasulti kanimo. Husto ba, sir? Oo. Dili kita magkaila. Bueno, makapamatuod siya mismo.

Kinsa ba ang namuhat niana? Ang Mesias, si Cristo.

²⁶⁸ Aniay usa ka babaye nga nagalingkod dinhi mismo, sa taliwala sa mga tawo, dinhi mismo. Makita n’yo ba kanang

Kahayag nga nagapaibabaw kaniya? Nagaantus siya tungod sa sa sakit sa panit. Mrs. Pitman, taga Owensboro ka. Kung usa ikaw ka estranyo, iwarawara ang imong kamot. Tinuod ba kanang mga butanga? Iwarawara ang imong kamot. Giayo ka na sa Dios. Wala ko pa nakita sukad-sukad ang maong babaye, kondili, diha lamang sa usa ka panan-awon.

²⁶⁹ Aron nga masayod ka, dinha mismo sa ibabaw nimo may usa ka babaye nga ginganla'g Ellis, Mrs. Ellis, usa ka batan-ong babaye. Aduna siya'y sakit pang-babaye. Usa siya ka estranyo usab. Kung husto kana, iwarawara ang imong kamot. Imo ba kanang inahan ang nagalingkod tupad nimo dinha? Usa ka babaye usab nga nagalingkod dinha, nga nagaantus tungod sa kahadlok, duna'y komplikasyon tungod sa kahadlok nga anaa kaniya. Kung husto kana, ipataas ang imong kamot, gining. Okey. Nawala na ang maong kahadlok. Puede ka nang mouli, og mamaayo na. Ginahagit ko kamo nga motoo.

²⁷⁰ Dinha dapit sa luyo, sa may suok, dinha sa luyo, dunay usa ka lalaki nga taga Minnesota, nga dunay problema sa likod. Ang imong ngalan mao si Mr. Carson. Tumindog ka. Nawala na ang problema sa imong likod. Giayo ka na ni Jesus Cristo.

²⁷¹ Dinhi dapit sa luyo mismo, aniay usa ka babaye nga nagaantus. Dili siya taga dinhi niining lungsod. Gikan siya sa usa ka lugar nga gitawag og Blue Island. Duol ra kana sa Chicago. Aduna siya'y sakit sa kasingkasing. Mrs. Braiden, tindog ka, og dawata ang imong kaayohan. Pauli na ug mamaayo na, sa Ngalan ni Jesus Cristo.

²⁷² Nagatoo ba kamo? Kumusta man sa niini nga bahin? Nasayod ba mo nga ang Mesias kana? Unsaon man pagkahibalo sa tawo?

²⁷³ Kining tanan nga mga tawo nga natawag, na, ug nasayod nga wala ko'y unsa man nga nahibaloan mahitungod kaninyo, ipataas ang inyong mga kamot, kamong tanan nga natawag na, dinha. Kita n'yo na?

²⁷⁴ Adunay usa ka tawo nga anaa sa akong luyo, nga nagaampo, dinhi luyo, sa usa ka lawak. Usa kini ka batan-ong lalaki, nga pution ang buhok, nagaampo siya para sa usa ka ig-agaw nga taga Kansas, og nga adunay kanser. Dumuol ka sa may pultahan. Magmaaduna ka og pagtoo sa Dios. Nagatoo ka ba?

²⁷⁵ Elmer, duna kana'y kahilambigitan kanimo. Nakita ko ang imong amahan nga anaa dinha, og ang iyang asawa. Taas ang presyon sa imong dugo. Kung nagatoo ka, nan ayohon ka sa Dios. Wala ko kabalo. Husto kana. Dili ba? Magtoo ka sa bug-os mong kasingkasing.

²⁷⁶ Nagatoo ba kamo? Nagatoo ba mo nga si Jesus Cristo mao ang Mesias? Nagatoo ba mo nga ania karon ang Iyang Presensiya? Timan-i n'yo, nga kaniadtong ang usa ka babaye mihikap sa bisti ni Jesus, naluya Siya. Tungod may gahum,

kusog, nga migula Kaniya. Karon hapit na usab kong maluya. Nagatoo ba kamo?

Iduko na nato ang atong mga ulo sa makadiyut.

²⁷⁷ Oh Jesus, ang Mesias sa Dios, kanunay Ka gayud nga anaa sa duol. Nasayod sab ang mga tawo nga Ikaw mao ang Anak sa Dios, nga ania Ka dinhi karon. Napamatud-an gayud ang Imong dagkung mga ilhanan ug mga katingalahan. Panalangini sila, Amahan. Panalangini sila, nagaampo ako. Hinaut nga karon mismo sila managpanoo, sa bug-os nilang kasingkasing, nga Ikaw, nga Mesias, Mao gayud kining ania dinhi. Walay si kinsa man nga makahimo niana. Imposible gyud kana nga mahimo sa tawo, Ginoo. Ngani milagro, nga makita ang gahum sa Mesias nga miabot nganhi niinaad gamay'ng, ubos nga dapit nga sama niini, tungod kay gisaad Mo man kini, Ginoo. Tungod kay, ania man ang Imong grasya para grasyahan kami. Tungod kay Imo kining saad nga buhaton kini, gibuhat Mo mismo kini. Nakita namo nga wala Nimo ginabiyaan ang Imong mga katawohan.

²⁷⁸ Karon, Amahang Dios, hinaut nga kadtong may mga prayer kard, nga mangduol diha sa linya sa pagpaampo, hinaut nga makabaton gyud sila og pagtoo para motoo. Oh Dios nga Makagagahum-sa-tanan, sa diha nga maipandong na ang mga kamot nganha kanila, hinaut nga mobiya sila dinhi, nga magakalipay, magingangit, og magadayeg sa Dios, tungod nga nangaayo sila. Itugot kini, Ginoo.

²⁷⁹ Ug itugot nga kining mga luwas na, masayod usab nga wala gyu'y maitago sa Dios. Tungod ginapahayag man sa Dios ang mga tinago sa kasingkasing; nasayod pud Siya sa matag panghunahuna nga anaa sa among hunahuna. Itugot kini, Amahan. Nagapangamuyo kami sa Ngalan ni Jesus Cristo. Amen.

²⁸⁰ Karon, kamong mga adunay prayer kard, dinha sa mga mananambong, kamong mga ania dinhi sa tabernakulo, dinhi dapit, nga dunay mga prayer kard, nagatoo ba kamo? Ipataas n'yo ang inyong mga kamot. Ug toohi n'yo nga ang usa ka tawo dili gyud makahimo niana. Kana'y siguradong nagagikan gyud sa Dios. Nagatoo ba mo nga usa kini ka saad sa Dios, nga miingon ang Dios nga pagabuhaton Niya kini? [Nagaingon ang kongregasyon, "Amen."—Ed.] Okey. Kung ingon niana nasayod mismo kamo nga Aduna gayu'y ania dinhi nga gawas pa sa tawo.

²⁸¹ Maalampoon kong ginasulti kining Pulong, sa atubangan sa Dios. Ang mga tawo nga gikaestorya ko, kon si kinsa man sila, wala gyud ako makaila kanila, ug wala sab sila makaila kanako. Sila'y mga estranyo lamang nga mianhi dinhi sa tabernakulo, sa kon asa man sila gikan.


²⁸² Duna ko'y nakita nga pipila ka mga panan-awon bahin sa mga tawo nga ania sa tabernakulo, apan gipasagdan ko na lang ang mga niini, oo, gipasagdan ko lang kini.

²⁸³ Kamong mga natawag na, kung kinsa man kamo, aron makita sa uban nga kamo gayu'y mga estranyo, ipataas n'yo ang inyong kamot. Kita n'yo? Ang matag usa, ang tanang mga estranyo.

²⁸⁴ May sa kung unsang butang nga padayong nagapanglihok kanako. Makita ko ang usa ka itum nga babaye nga nagatungha sa akong atubangan, kaganina pa, aduna siya'y arthritis ug taas pud ang presyon sa iyang dugo. Oo. Usa ka ka estranyo sa among taliwala. Taga Memphis ka, Mrs. Sals. Mao kana ang imong apelyido. Unang higayon mo pa nga makatambong dinhi. Nagatoo ka ba sa Ginoo, sa bug-os mong kasingkasing? Kung ingon-ana puede ka nang mouli ug luwas na, og ayo na. Giwagtang na kana sa Dios alang sa maong babaye.

²⁸⁵ Ang tanan, magtoo gayud sa bug-os n'yong kasingkasing. Ipataas ang inyong mga kamot karon, ang tanan. Magtoo kamo sa bug-os n'yong mga kasingkasing. Ipandong ang inyong mga kamot diha sa usa'g usa.

Ari ka, Igsoong Neville. Ari ka, ikaw ang mag-ampo.

²⁸⁶ Samtang ginaduko nato ang atong mga ulo, magaampo si Igsoong Neville. 

ANG MENSAHE MAHITUNGOD SA GRASYA CEB61-0827
(The Message Of Grace)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Agosto 27, 1961, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org